

روم

سورت کیریم هق توهن بري فولوس
تولیس کفد فواق المسیح دکوت روم

باب 1 فولوس جاني سئورغ هق باوا تيته عیسی المسیح

- 1 کفد ادیق برادیق کو سما، اورغ هق توهن کاسیه دکوت روم. اکو ني فولوس، هق کرج کا عیسی المسیح، کیریم سورت کفد مو. توهن لتق اکو جاني سئورغ دالم فواق هق باوا تيته ني. کرج اکو ني، کنا میمفي خبر بایک هق توهن جنجي دغن ني ۲ بولو دالم کتاب یغ سوچی.
- 3 خبر بایک ني چارا حال انق توهن یغ ساتو، یایت عیسی المسیح، ربی کیت. نق رویت حال عیسی جاني مانیسی، دي کتورونن راج داود.
- 4 نق رویت حال عیسی جاني توهن یغ سوچی، توهن، دغن کواس فنوه هق دي، بري پات کات عیسی تو جاني انق دي، کران لفس فد عیسی ماتي، توهن بري دي هیدوف کلیق سمولا.
- 5 سابیت ربی کیت سانیله، توهن تورون رحمة اتس اکو، فولوس، بري جاني سئورغ هق باوا تيته دي. کرج اکو ني، کنا فیمفین اورغ سما بغسا، بري فرجاي فس طاعة کا توهن، دغن توجوان نق بري نام عیسی تو دافت مليا.
- 6 فواق مو دکوت روم فون، ماسوق جوگ دالم فواق هق توهن

7 فڱگيل جاني ميليق المسيح. سبب توله، اكو کيريم سورت ني
کا فواق مو، هق توهن بري جادي ميليق دي.
اکو مينتاء توهن باف کيت دغن ربي عيسى المسيح، تورون
رحمة اتس فواق مو، دغن سلامت سجهترا!

فولوس اوچف تريما کاسيه کا توهن

- 8 مولا ۲ سکالي، اکو اوچف تريما کاسيه کا توهن، دغن نام
عيسى المسيح، سبب خبر کات فواق مو سموا برايمان قواة
کا توهن، مشهور کي سرات تمفت.
- 9 اکو براني فڱگيل توهن جاني سقسي، کات سوڱکوه اکو دوق
مينتاء دعا ايغت کا فواق مو سعمور. انتوق توهن نيله اکو
کرج دغن سوڱکوه ۲ هاتي، نق ميمفي خبر بائک چارا حال انق
10 ري. لاني اکو مينتاء توهن بري اکو بوليه ماري زياره فواق مو.
11 سبب لام ماري ده، اکو دوق براس چيتا ۲ نق ماوي برتمو دغن
مو، نق سره کا فواق مو فرکارا ۲ هق توهن تورون کا اکو، نق
بري قواة ايمان مو.
- 12 بالس توله، ايمان کو نق تولوغ تمبه هاتي مو بري فرچاي قواة
فس، ايمان مو فون نق تولوغ تمبه هاتي کو، بري فرچاي قواة
13 جوگ. اکو نق بري اديق براديق تاهوکات، اکو دوق برحاجة
بايق کالي ده، نق ماري زياره فواق مو، تافي ار چمفيغ
سعمور، تاء ليه ماري. کهنلق هاتي کو نق بري کهور منبه
اورغ فرچاي دکوت روم مو، نق بري سروف دغن بغسا لائن ۲
رتمفت هق اکو بياس کي زياره لفس ۲ ده.
- 14 اکو مستي کنا کي رويت خبر ني کا سموا بغسا، سروف اکو
لکت اوتغ کا سموا اورغ. اکو کنا کي رويت کا اورغ هيلير دغن
اورغ دارت، کا اورغ ار علمو دغن اورغ تاء ار علمو، بري تاهو
سروف سموا.

15 سبب توله، هاتيکو دوق سيمفن سيف ده نق ماري رويت خبر بـءـيـک کا فواق مو دکوت روم فول .

خبر بـءـيـک حال عيسى ار کواس

16 اگو بوليه جامين کات، خبر بـءـيـک ني بوليه هارف سوځوه .
خبر بـءـيـک ني، يـءـيت کواس درفد توهن، هق بوليه بري سموا
اورځ هق فرچاي دافت سلامت، سمغي کا اورځ يـهـوـوي دولو،
فس سمغي کا بغسا لـءـين ۲ فول .

17 خبر بـءـيـک ني بري تاهو چرف کات، توهن سيمفن سيف ده،
جالن هق مـءـنـسي بوليه جادي تـءـساله دفتداغن توهن. جالن
ني، مـءـنـسي بوليه ماسوق، بوليه توروت، دغن فرچاي کا
عيسى ساج، بوکن دغن سبب لـءـين، دق ! اد ايات دالم کتاب
کات بالس ني جوځ، يـءـيت :

اورځ فرچاي، توهن کات دي تـءـساله ده، فس
توهن نق بري کا دي هيډوف چارا بارو.

توهن مرک کا مـءـنـسي هق سوک بوات جاهت

18 ار اورځ مځهينا کا توهن، ار اورځ سوک بوات جاهت سموا
فرکارا، هق بوات بري اورځ لـءـين تـءـليه تريما فرکارا هق سبـنـر
درفد توهن. سبب توله، توهن سوده بري تاهو چرف کات،
دي مرک نق جاتوه حکوم.

19 توهن مرک، کران دي سوده بري تاهو کا مـءـنـسي حال دي دغن
تروس ترځ، تافي مـءـنـسي تـءـسير تريما .

20 جق توهن جاديکن دنيا ماري، مـءـنـسي بوليه فرهاتي کليه
صيغه ۲ توهن، دي هق مات کيت تـءـليه نمفق. درفد سموا
فرکارا هق دي بري جاني دالم دنيا تو، کيت بوليه فرهاتي

کليه کات، ديا له توهن، فس کواس يي تاء اد سور. نق کات تاء تاهو حال يي، تاء ليه.

21 ولو فون مائسي تاهو حال توهن بالس تو، تافي يي تاء سير

حرمة کات توهن. فس يي تاء سير تريما کاسيه لغسوغ کا توهن. فيکيران يي سست، هاتي يي جاني گلف ده.

22 مائسي کات ديري يي چريديق، تافي سسوغکوهن، يي بودوه.

23 يي تاء سمبه کا توهن يځ ککل، يي تيځگل کي بوات برهالا ۲،

روف ۲ مائسي، روف بوروغ، روف بناتځ، روف ناگ، نق سمبه کنتي توهن.

24 سبب مائسي بودوه ستارا تو، توهن فون لفس يي کي، بوات

ايکوت نفسو يي، هق چافوغ، هق چمر، سهيځگ بايق اورځ خيانه توبوه يي، بوات فرکارا هق کجي ساغت سام سنديري

25 يي تيځگل توهن هق سبڼر، کي توروت هق فلسو. يي سمبه

بارځ ۲ لاین، نق بوات کنتي توهن، توهن هق بري جاني

بارځ ۲ هق يي سمبه تو، توهنله هق فاتوت کيت فوجي،

بوات سلام ۲، امين!

26 سبب مائسي سوک بوات جاهت گيتو لالو، توهن لفس يي

کي، بوات ايکوت هوا نفسو يي. فس نفسو جنتن بتينا بوات

ساله عادة، هيځگ سمفي اورځ بتينا فون تيځگل اورځ جنتن

برکن سام اورځ بتينا.

27 اورځ جنتن فون سروف تو جوگ. يي تاء برکن اورځ بتينا،

کي گيلا سام جنتن يي. دغن سبب يي بوات فرکارا ۲ يځ

هيئا تو سام سنديري، توبوه يي فون فونه. يي دافت بالسڼ

هق سوځ فاتوت دغن کجهاتن يي.

28 مائسي تاء سير تريما علمو هق سبڼر حال توهن. سبب توله

توهن فون لفس بري هاتي يي گلف، فيکيران يي سست، بوات

سموا فرکارا هق مائسي تاء فاتوت بوات.

چيتا ۲ جاهت اد فنوه دالم هاتي مائنسي

- 29 مائنسي ني سموا، چيتا ۲ جاهت اد فنوه دالم هاتي. بارغ ري سنديري ار ده، تافي ري طمع نق هق اورغ لائين. ري سوک بوات هوډوه کا اورغ لائين. نفسو بريغکي، سوک بونوه اورغ، برياله سام سنديري، فندي منيفو، برکنن تيغوق اورغ لائين جاتوه سوسه، سموا نفسو ني دوق فنوه دالم هاتي ري. ري سوک کيچيق مغوفت دغن چرچ کا اورغ.
- 30 ري بنچي کا توهن، ري سومبوږ کا مائنسي، هاتي ري تکبور. ري سوک بسرکا ډيري ري. ري فيسه چاري جالن نق بوات جاهت سماچم، ري درهاک کا ايبو باف.
- 31 ري هيډوف تاء تنتوکالو. ري سوک موغکير جنجي دغن اورغ، هاتي ري تاء ار کسياغ بلس کا اورغ لغسوږ.
- 32 توهن سوده لتق حکوم کات، اورغ هق توروت سموا فرکارا ني، فاتوت ري کنا حکوم نراک. مائنسي تاهوده حکوم ني، تافي ري بوات جوگ لبيه ۲ لاگي، ري برکنن تيغوق اورغ لائين بوات جاهت سروف ري.

توهن نق جاتوه حکوم

باب 2

- 1 هي سائين کو! اکو فولوس نق تان سيکيت. باءاف، مو سوک حکوم ساله کا اورغ لائين؟ بيلا مو بوات ساله سروف ري، مو کنا حکوم ډيري مو سروف ري جوگ! نق کات تاء ساله تاءليه.
- 2 بيلا توهن جاتوه حکوم کات، اورغ بوات جاهت تو، ساله، سموا اورغ فاکت ستوجوکات، موليق ده، حکوم بالس تو!
- 3 تافي ايغتله، سائين کو! بيلا مو حکوم ساله اورغ هق بوات فرکارا ۲ تو، فس موکي بوات سروف ري، مو نق لاري بري لفس فد حکوم تاءليه جوگ!

- 4 بغکالي سائين بوات تاءبرت کا توهن، سبب توهن کسياغ بلس
صبر، تاءجاتوه حکوم اتس مو بلس تو؟ تاءفهم که، کات،
توهن کسياغ بلس سمفي ستارا تو، سابيت دي برکهندق نق
بري مو فلواغ باليق هاتي، توبه؟
- 5 تافي مو هاتي کرس، تاءسير توبه! بيلا هاتي مو کهور کرس،
کهور برت لاگي حکومن اتس مو فد هاري قيامه، ياءيت هاري
توهن نق حکوم اتس مائنسي سموا، دغن عاديل.
- 6 فد هاري توله، گنف ۲ اورغ نق بوليه بالسن ايکوت فرکارا۲هق
7 دي بوات ده. ستغه اورغ کاچغ بوات ياءيک سمور. اورغ ني
چاري هق مليا، هق سبئر، هق ککل. کفد اورغ نيلاه توهن
نق بري هيديوف چارا بارو هق دي سمور۲.
- 8 فس ار ستغه اورغ دوق ايغت نق بري سنغ کا ديري دي ساج.
دي تاءسير توروت هق سبئر. دي توروت هق جاهت سمات.
- 9 تنتو توهن نق مرک تروق کا اورغ بالسن ني. توهن نق تورون
سيقسا سغسارا اتس گنف۲ اورغ هق بوات جاهت بلس تو،
مولا۲ تورون اتس اورغ ييهوي دولو، فس سمفي کا بغسا لاءين ۲
10 فول. تافي اورغ هق بوات ياءيک، گنف۲ اورغ، توهن نق بري
مليا کا دي، نق فوجي کا دي، نق بري دي سلامت، مولا۲
کفد اورغ ييهوي، فس سمفي کا بغسا لاءين ۲ فول.
- 11 کران توهن عاديل، دي نق تيغوق مائنسي سروف سموا.
- 12 اورغ هق دوق لوار فد اوکام ييهوي، توهن نق جاتوه حکوم
اتس دي، کران دي لغکر حکوم دي، بوکن کران دي بوات ساله
حکوم۲ دالم تورات. تافي اورغ ييهوي فول، توهن نق جاتوه
حکوم اتس دي، کران دي بوات ساله دغن تاء توروت حکوم ۲
دالم تورات.
- 13 سابيت، بوکن کران اورغ بوليه دغر حکوم۲ تورات، هق توهن
کات تاءساله، دق! تافي اورغ هق بوليه بوات توروت سموا

- حکوم ۲ تو، هق توهن کات تاء ساله.
- 14 اورغ هق دوق لوار فد اوکام ييهوي، ولو دي تاء تاهو کتاب تورات سکالي فون، کالو دي بوات فرکارا ۲ بتول، هق اد سوروه دالم کتاب تو، سابيت دي تاهو هق باء يک، معنائ هق دي تاهو دالم هاتي توله، توهن بري جادي سروف حکوم. انتوق ني. 15 فريواتن اورغ تو، جايي تندا کات، ني اد دالم هاتي دي هق تيمبغ ني، سروف دغن حکوم ۲ دالم کتاب تورات. تکه ۲، هاتي ني کات هق دي بوات تو ساله، تکه ۲ کات، هق دي بوات تو، بتول. ني فون جايي تندا سوغکوه کات، ني اد حکوم دالم هاتي ني.
- 16 بيلاسمفي هاري قيامه، توهن نق بري عيسى المسيح فريقسا سموا فيکيران دالم هاتي ماء نسي، باروله دي نق کرت سين. سموا هق اکو بارو رويت ني، اد ده دالم خبر باء يک هق توهن بري کا اکو

اورغ ييهوي کيچيق بسر، تافي ني هينا کا توهن

- 17 هي سائين کو! اکو نق کيچيق هو بوغ سيکيت لاکي. مو کيچيق بسر کات، مو اورغ ييهوي هق فکغ سموا حکوم ۲ توهن. مو کات، توهن فيليه بغسا مو ساج.
- 18 مو تاهو کهندق توهن هق دي سوروه مو بوات. فس، دغن مجاجي سموا حکوم ۲ دالم کتاب تورات، مو تاهو فيليه، جالن مان موليق، جالن مان تاء موليق.
- 19 تنتوله مو کات، مو بوليه فيمفين اورغ هق مات هاتي بوت، مو بوليه جايي فليتا کا اورغ هق برجالن دالم گلف.
- 20 مو بوليه اجر اورغ هق تاء فندي باوا ډيري، مو بوليه جايي گورو کا اورغ هق تاء اد علمو. فواق مو مفاکو کات سموا علمو، سموا فرکارا هق بنر، اد رويت چوکوف سيف ده دالم کتاب تورات.

- 21 سائين ڪو! اڪو نق تان فول. باءِ اف مو اجر اورغ لائين، تافي
 مو سنديري تاءِ بوات؟ مو کات: جاغن چوري، تافي مو کي چوري.
 22 مو کات: جاغن برزينا، تافي مو برزينا! مو بنجي کا فواق هق
 بوات برهالا، تافي فواق مو کي چوري بارغ هق اد دالم رومه
 برهالا!
 23 مو کيچيق بسرکات، بغسا موساج بوليہ تريما حکوم ۲ توهن،
 تافي مو بوات هيٺا کاتوهن، دغن لغکر حکوم دي تو.
 24 اد ايات دالم کتاب، کات:

دغن سبب فريواتن اورغ يهوي نيله، بغسا لائين ۲
 سموا تيغوق هيٺا کاتوهن.

برسونه دغن توروت حکوم ۲ توهن، مان هق مستحق؟

- 25 کالو مو بوات ايکوت حکوم ۲ توهن دالم کتاب سوغکوه،
 روکون مو برسونه تو اد فائده. تافي کالو مو لغکر حکوم توهن
 تو، روکون مو برسونه فون، سيا ۲ ساج.
 26 کران اورغ بغسا لائين ۲ هق تاءِ تريما روکون برسونه، کالو دي
 بوات هق بتول، ايکوت حکوم توهن، توهن تريما دي سروف
 اورغ برسونه ده، بوکن؟
 27 سسوغکوهن، فواق ني هق تاءِ برسونه تافي دي توروت حکوم ۲
 توهن، دي بري پات کات، اورغ يهوي ساله سوغکوه، کران دي
 برسونه ده، دي تريما حکوم ۲ توهن ده، تافي دي لغکر حکوم ۲
 تو.
 28 اورغ يهوي سجاتي، اورغ بالس مان؟ اورغ هق بغسا دي يهوي
 هق برسونه که؟ بق! هق سجاتي بوکن فرکارا هق لوار، بق!
 29 تندا اورغ يهوي سجاتي بالس ني. دي تريما سوروهن توهن بري
 ماسوق هاتي. بوکن دي تريما تندا برسونه دتوبوه ساج، بق.

تندا دالم هاتي ساءني كنا جاي دغن كو اس روح توهن .
 تاءليه جاي دغن سبب لاءين . اورغ ماچم نيله ، دي تريما
 فوجين درفد توهن ، تاء كيرا فوجين ماء نسي .

اف فائده جاي اورغ اوکام يهوي ؟

باب 3

- 1 ميسل ، ار اورغ تان کات : اف فائده جاي اورغ بغسا
 يهوي ؟ اف فائده تريما روکون برسونه ؟
- 2 اکو جواب کات : تنتو فائده ار بايق . ساتو ، توهن لتق بغسا
 يهوي ني بري ميمفي خبر توهن کا سموا ماء نسي .
- 3 فس ميسل ، اورغ تان فول : کالو ار ستغه اورغ يهوي هق تاء
 سير توروت کهندق توهن ، انتوق بغسا دي ، توهن نق فوتوغ
 کا بق ، فرجنجين دي دغن فواق يهوي ؟ تنتو تاء ليه !
- 4 فرکتان توهن تتف سمات . ولو فون ماء نسي سموا بوليه بوهوغ ،
 تافي توهن تاء بوهوغ . سروف ار ايات دالم کتاب کات :

يا توهنگو! سموا اورغ مفاکو کات ، بنر سوغگوه
 فرکتان مو . تاء ار سياف بوليه کات توهن ساله !

- 5 فس ، ميسل ار اورغ نق بحس لاکي ، کات : ماء نسي کيت بياس
 بوات ساله سعمور . کالو دغن کسلاهن کيت ، اورغ لاءين بوليه
 نمفق کهور چرف لاکي ، کات ، توهن بتول ، فس سابيت تو ،
 اورغ فاکت فوجي کا توهن ، موليق کا بق ، توهن نق جاتوه
 حکوم کا کيت ؟ نمفق تاء موليق ! اينيله فرکتان اورغ بحس ساج .
 تافي اکو جواب : تاء ليه کات بالس تو ! بيلا کيت بوات ساله ،
- 6 توهن مستي کنا عاديل ، مستي کنا جاتوه حکوم . کالو دي تاء عاديل
 دي تاء ليه جاي حاکيم اتس سموا ماء نسي ، بوکن ؟
- 7 فس ميسل اورغ بحس تان فول : ميسل ، کيت بوهوغ ، فس دغن
 سبب کيت بوهوغ تو ، اورغ لاءين نمفق کات ، توهن تاء بوهوغ .

فس، کهور فوجي کا توهن لبیه فد دولو. کالو کیتو، سبب اف توهن نق جاتوه حکوم کات کیت اورغ بردوسا؟ اورغ بحس تان. تافي اکو فولوس نق جواب: کالو مو فهم بالس تو، سروف کات 8 مولیقله کیت بوات جاهت، کران نق بري مولیق کوء دافن! فیکیران بالس ني ساله سمات. تافي اد اورغ کات، اکو فولوس دوق مفاجر اورغ بالس تو. دق سکالي! فواق هق چرچ کا اکو بالس تو، نق کنا حکوم برت هق سوغ فاتوت.

سموا مائسي دوق دالم فرينته هوا نفسو دي

9 کالو کیتو، میسل اد اورغ تان لاگي: کیت اورغ یهودي، اد کا دق فائیده کا بغسا کیت سنديري، لبیه فد بغسا لائين؟ اکو فولوس جواب: تاء! اکو سوده تنجوق دغن پات، کات، سموا مائسي دوق باوه فرينته نفسو جاهت هق دي. اورغ یهودي دغن بغسا لائين ۲ فون سروف. 10 اد ايات دالم کتاب کات:

اورغ هاتي بتول، تاء! اد سئورغ هابوق. 11 تاء! اورغ بولیه ارتي حال توهن. تاء! اد سیاف دي نق چاري توهن. سموا اورغ فالیع کي کوء جالن لائين ده، 12 جادي فونه هابیس، توهن کات. اورغ بوات بايک تاء! اد. فرکتان هق توبیت دمولوت 13 دي، اد بهیا، سروف لیاغ هق اورغ تاء! کمبوس لاگي. لیده دي سبوت فرکارا بوهوغ سعمور. فرکتان دي بیسا نق بوات خیانه کا اورغ. 14 دي سوک ماکی اورغ بري ساکیت هاتي. کالو اد فلواغ فون، دي بونوه اورغ سلالو. 15 مان ۲ جالن ري لالو، دي بوات خیانه کا اورغ، بري اورغ 16

سوسه هاتي ساغت .

نق دوق سنغ دغن اورغ تاءليه .

كا توهن فون يي تاء تاكوت لغسوغ .

17

18

19 ايات ۲ هق كيت باچ دالم كتاب سائي، سبوت حال اورغ بغسا

يهوي، هق تريما ده حكوم ۲ توهن دالم كتاب . جايي فواق

نيله هق كنا توروت سموا فركارا هق توهن سوروه دالم كتاب

ي . توجوان توهن ، يي نق بري سموا اورغ كاتوف مولوت ،

دوق سيف ۲، تاءليه كات تاءسالة ، سبب سموا اورغ اد سالة

بلاک . بگيتوله ، کيت بوليه تاهو کات ، سموا اورغ دنيا سالة ،

فاتوت توهن كنا جاتوه حكوم اتس يي .

20 سسوغكوهن ، مائسي کيت تاءليه توروت سموا حكوم ۲ توهن ،

انتوق نق بري توهن کات ، کيت تاء سالة اف ۲ . تنتو تاءليه .

تافي دغن سبب حكوم ۲ تو ، مائسي کيت بوليه تاهو ستارا

مان سالة هق کيت بوات .

ار جالن مائسي بوليه جايي تاءسالة دنداغن توهن

21 تافي لاني توهن بري پات ده کات ، ار جالن مائسي بوليه

جايي تاءسالة دنداغن يي ، تاء سروف دغن جالن توروت حكوم

حكوم دالم كتاب . كتاب سموا نبي ۲ اد سبوت حال جالن ني

22 جوگ . توهن نق بري اورغ بغسا مان ۲ فون جايي تاءسالة

دنداغن يي ، کو جالن فرچاي ، ياءيت فرچاي دغن عيسي

المسيح . بغسا مان ۲ فون سروف دنداغن توهن .

23 کران سموا اورغ اد دوسا ، سغکج جاءوه دغد کمليان هق توهن

نق بري کا مائسي .

24 تافي توهن کسياغ بلس سمات ۲ . يي تورو رحمة اتس مائسي ،

جايي هديه ، بري ار جالن بوليه کات مائسي کيت تاء سالة

ده. کیت بولیه لفس فد حکوم توهن اتس دوسا، دغن کران عیسی المسیح.

- 25 سبب توهن جاتوه حکوم اتس عیسی المسیح، بری دی قربان پاوا دی کنتی کیت. کیت هق فرچای فرکارا نی، نق بولیه امغون سموا دوسا. بالس تو، توهن تنجوق کات دی عادل. ماس دولو، توهن دوق صبر، تاه جاتوه حکوم اتس مائسی کیت. 26 تافی لانی، دی تنجوق بری نمفق کات، دی توهن یغ عادل سوغکوه. فس، دی بری نمفق کات، کیت هق فرچای کا عیسی، تاه ساله ده دنداغن دی.

جالن سا ساج، یاءیت جالن فرچای

- 27 کالو کیتو، ار کا دق سبب بری کیت بسر کا دیری، کات تاه ساله تو؟ تاه ار. کران بوکن سبب کرج کیت بوات، هق توهن کات کیت تاه ساله، دق! تافی سبب کیت فرچای ساج. سابیت تو، تاه ار سبب کیت بولیه بسر کا دیری.
- 28 کران ار ساتو جالن ساج، هق بولیه توهن کات مائسی تاه ساله ده دنداغن دی، یاءیت جالن فرچای، بوکن جالن توروت حکوم ۲ توهن ده.
- 29 بغکالی ار اورغ یهودی هق سغک کات، توهن دیاله توهن هق بغسا یهودی ساج. دی تاه فهم که، کات، توهن سا ساج اتس سموا مائسی، اتس سموا بغسا؟
- 30 فس سابیت دی سا تو، توهن ار جالن سا جوگ، هق بولیه کات مائسی تاه ساله دنداغن دی، یاءیت جالن فرچای، بغسا یهودی کران دی فرچای، بغسا لاین ۲ کو جالن فرچای جوگ.
- 31 بغکالی اورغ نق کات: تاکوت دغن جالن فرچای نی کیت نق تولق تاه فاکي حکوم ۲ توهن. دق! بوکن بالس تو. سسوغکوهن کیت ستوجو دغن حکوم ۲ توهن، نق فکغ بری کهور قواة لاکي.

نبي ابراهيم جاني چنتوه انتوق کيت

- 1 ماري کيت فرهاتي کليه کا نبي ابراهيم، تو نينيق اورغ
 2 ييهوي کيت. سوغکوه کا دق، توهن نمفق ابراهيم تاء ساله دغن
 کران ري بوات ايکوت حکوم ۲ هق توهن سوروه؟ تاء سوغکوه!
 کالو توهن نمفق ابراهيم تاء ساله ده، دغن کران ابراهيم بوات
 توروت سموا حکوم ۲ توهن تو، تنتو ابراهيم بوليه بسر کا ديري
 ري، بوکن؟ تافي ابراهيم تاء ار اف سکارا هق بري ري سبب
 بوليه بسر کا ديري دافن توهن، سروف ار ايات دالم کتاب کات:

ابراهيم فرچاي کا توهن. سبب نيلاه توهن کيرا
 کات ابراهيم تاء ساله ده دغنداغن ري.

- 4 ميسل سئورغ ماري اوفه کيت بوات کرج. بيلا سوده کرج تو،
 اوفه کيت تاء ليه کيرا کات هديه. اوفه تو هق سوغ فاتوت
 دغن هق کيت کرج.
 5 تافي ماء نسي دغن توهن بوکن بالس تو. توهن تاء بري ماء نسي،
 بوات کرج انتوق دافت بالسن. توهن سوروه کيت فرچاي، فد ري
 هق يغ ار کواس بري اورغ ساله جادي بتول. بيلا کيت فرچاي
 بالس تو، توهن کات، کيت تاء ساله ده دغنداغن ري.
 6 نبي داءود فون سوده کات اورغ هق براونتوغ سوغکوه، ياءيت
 اورغ هق توهن کات تاء ساله ده، دغن کران اورغ تو توروت
 جالن فرچاي. بوکن ري توروت جالن بوات کرج اف ۲ فون.
 نبي داءود سبوت دالم کتاب کات:

براونتوغله اورغ هق توهن امفون ده کسلاهن ري، اورغ
 هق توهن هافوس هابيس دوسا ۲ ري. براونتوغله اورغ هق
 توهن تاء کيرا دوسا ري بايق مان ۲ فون!

- 9 اورغ هق نبي داور کات براونتوغ سائي، فواق مان؟ اورغ ييهوي هق برسونه توساج که؟ نق! بي سبوت حال اورغ هق تاء برسونه جوگ. نبي ابراهيم هق کيت رويت سائي، جاي چنتوه انتوق کيت جوگ. توهن کات ابراهيم تاءساله ده نغن کران ابراهيم فرچاي ساج.
- 10 فيکيرله سبنتر! فد ماس تو، ابراهيم برسونه ده کا نق لاکي؟ نق، دي تاء برسونه لاکي.
- 11 نغن کران ابراهيم تورو جالن فرچاي، توهن کات ابراهيم تاءساله ده. لفس تو فول، بارو توهن بري دي برسونه، جاي تندا کات دي تاءساله ده دفنداغن توهن. توجوان توهن، نق بري ابراهيم جاي توء نينيق کا سموا اورغ هق تورو جالن فرچاي، فس سابيت تو، دي تاءساله ده، ياءيت بغسا لاین ۲
- 12 هق تاء برسونه، سکالي نغن اورغ ييهوي هق برسونه ده، تافي هق تورو جالن فرچاي کاتيق، ايکوت چنتوه توء نينيق ني، نبي ابراهيم، هق فرچاي دولو لاکي فد دي برسونه تو.

فرجنجن توهن کا ابراهيم سمفي کا کيت لاني

- 13 ار فساک هق توهن جنجي نق بري کا ابراهيم، سمفي کا سموا انق چوچودي، ياءيت توهن نق بري دي فرينته اتس سموا دنيا، ماس کوء دافن. توهن جنجي نق بري فساک ني، بوکن سبب ابراهيم تورو سموا حکوم ۲ دالم کتاب، تافي سبب ابراهيم فرچاي ده، فس سابيت تو، توهن کات دي تاءساله.
- 14 کالو مائنسي بوليه تريما فساک تو کوء جالن تورو حکوم دالم کتاب، سروف کات، تاء ار فائده، جالن فرچاي تو. فس، سروف توهن برجنجي مائين ۲ ساج. تافي نق! توهن تورو حکوم ۲ دالم کتاب، توجوان دي، نق بري مائنسي کا بر
- 15

- کات توهن نق مرک دغن اورغ ساله حکوم تو. فس کالو تاء ار
حکوم، تندو اورغ تاء ليه لغگر حکوم تو، بوکن؟
16 سابيت نيله، توهن بري فساک هق دي جنجي تو کنا برگنتوغ
فد جالن فرچاي، نق جامين کات، فساک هق توهن بري
دغن کاسيه تو، نق بوليه کا سمو اورغ هق جادي کتورونن نبي
ابراهيم، بوکن کا ساتو بغسا هق تورتو حکوم ۲ دالم کتاب ساج
تافي کا مائنسي مان ۲ هق فرچاي کا توهن سروف نبي ابراهيم.
کران دي جادي توء نينيق سمو اورغ هق فرچاي.
17 ايکوت ساتو ايات دالم کتاب، توهن کات کا ابراهيم:

اکو لتق مو جاي توء نينيق مائنسي بايق بغسا.

- هق توهن جنجي تو مستي کنا جاي. کران توهن هق
ابراهيم هارف تو، ار کواس بري اورغ ماتي هيديوف کليق.
18 بي بوليه بري فرکارا هق تاء ار، جاي ار. سوغکوه فون
ابراهيم تاء ار هرافن نق بوليه انق، تافي دي تاء فوتوس
فرچاي، کات، بي نق جاي توء نينيق بايق بغسا، ايکوت
فرجنجين توهن کا بي، کات:

مو نق دافت کتورونن بايق، سروف بينتغ دلاغيث.

- 19 فد ماس تو، ابراهيم عمور دي دکت نق سمغي سراتوس تاهون
ده. بي تاء کيرا کات توبوه دي توا ده، تاء فيکير کات ساره،
بيني بي، تاء بوليه انق کران دي مندول، دق!
20 ابراهيم تاء فوتوس فرچاي، فس بي تاء شک هاتي حال فرجنجين
توهن تو. سبب توله دي کهور فوجي توهن، کهور قوا
21 فرچاي، کران بي يقين کات، توهن ار کواس بوليه بري سمفرن
22 فرجنجين بي. فس سبب ابراهيم فرچاي سمفي سکت تو، توهن
فون کيرا کات ابراهيم جادي اورغ هق تاء ساله دفتداغن توهن.

- 23 فرکتان توهن ساءني: توهن فون کيرا کات دي اورغ هق تاءساله تو، توهن بري بوکن کا ابراهيم ساج،
- 24 تافي دي بري کا کيت کاتيقي، هق فرچاي کا توهن، هق بري عيسي، ربي کيت، هيدوف کليقي. دغن کيت فرچاي بالس تو، توهن کات، کيت تاء ساله ده دفنداغن دي.
- 25 کران دوسام کيت، عيسي کنا حکوم بونوه. فس انتوق بري کيت تاء ساله دفنداغن توهن، عيسي هيدوف کليقي سمولا.

باب 5 کيت بوليه برهوبوغ جادي باءيك دغن توهن سمولا.

- 1 لاني کيت تاء ساله ده دفنداغن توهن، کران کيت فرچاي دغن ربي کيت، عيسي المسيح. سبب نيله، کيت بوليه برهوبوغ باءيك سمولا دغن توهن.
- 2 جادي عيسو المسيح نيله هق سوده بري کيت بوليه برهوبوغ دغن توهن بالس ني، بوليه تريما رحمة. لاني کيت بوليه فوجي توهن دغن سوک هاتي، کران کيت دوق ايغت کا فرکارا يغ مليا، هق توهن چادغ تاروه نق بري کا کيت.
- 3 فس لاگي، کيت بوليه فوجي توهن دغن سوک هاتي، کران سموا کسوساهن کيت جوگ. سبب کيت تاهو ده، کات، دغن کسوساهن ني، توهن نق اجر کيت بري برديري تکف.
- 4 دغن بري کيت برديري تکف ني فون، توهن سوده تيغوق ده هاتي کيت کات موليق، کران دي نق بري کيت هارف کا دي سمات ۲. فس هرافن کيت ني تاءسيا ۲. کيت بوليه هارف بالس ني دغن سبب کواس روح توهن، هق دي چوچور تورون کا هاتي کيت، نق بري کيت کابر سعمور، کات، توهن کاسيه کا کيت سموا.
- 6 کران بيلا سمفي کا ماس هق توهن سوده لتق دولو، ياءيت فد ماس کيت تاءليه تولوغ ديري کيت سنديري، ولو کيت دوق درهاک

کا توهن سکالي فون، توهن بري جوک عيسو المسيح قربان پاوا کنتي کيت.

7 ميسل، اد اورغ هق هاتي بتول، هق سماو اورغ حرمة. ولو اورغ حرمة کا دي فون، تنتوله تاء اد سياف ريلا سره پاوا، ماتي کنتي اورغ هاتي بتول تو. فس، سئورغ لاگي، بوات باءيک، هق سماو اورغ کاسيه. بفکالي اد ساتو اورغ ريلا قربان پاوا، ماتي کنتي اورغ تو.

8 تافي ايغتلہ! ستارا مان توهن تنجوق کاسيه کا مائنسي کيت، اورغ بردوسا. تکه کيت دوق درهاک کا توهن لاگي، المسيح قربان پاوا، ماتي کنتي کيت.

9 کالو المسيح قربان پاوا دي، بري بوليه توهن کات کيت تاءساله ده، تکه کيت دوق درهاک بالس تو، لبيه ۲ لاگي ماس کو دافن، کيت هق تاءساله ده، نق بوليه لفس درفد مرک توهن، دغن سبب المسيح تو.

10 کران تکه کيت جادي سترو دغن توهن لاگي، توهن بري کيت بوليه فاليع کليق برهوبوغ باءيک دغن دي سمولا، دغن کران انق دي ماتي تو. تنتوله لبيه ۲ لاگي، کيت هق برهوبوغ ده دغن توهن، نق بوليه تريما سلامت فد ماس لاني، دغن کران عيسی دوق هيديوف سلام ۲ تو.

11 فس اد سکارا لاگي. عيسی المسيح، ربي کيت، بري کيت بوليه فوجي توهن دغن فنوه سوک هاتي، کران عيسی سوده بري کيت بوليه برهوبوغ جادي باءيک سمولا دغن توهن.

دوسا مائنسي ماري دمان؟

12 مولا ۲ دوسا تيمبول دالم دنيا دمائسي ساتو اورغ ساج، يائيت تو ادم. لفس تو، حکوم ماتي فون تيمبول ماري، سبب دوسا تو ادم سائي. فس تو، کسموا مائنسي کنا ماتي، کران

مائنسي سموا تو ار دوسا دفنداغن توهن .

13 سسوغكوهن، بلوم فد توهن تورون حكوم ۲ كا نبي موسي لائي،
دوسا ار ده. فس ماس تو، اورغ بوات دوسا، تافي توهن تاء
كيلا ساله حكوم دالم كتاب.

14 ولو بالس تو فون، جق دماس توء ادم، هيغك سمفي كا ماس
نبي موسي، مائنسي سموا تاء لفس فد حكوم ماتي. اورغ هق بوات
دوسا لائين فد هق توء ادم بوات دوسا فون، كنا ماتي جوگ.

ادم دغن عيسي

توء ادم جايي سرورف چنتوه بري كيت فهم حال سئورغ
هق ماري بلاكغ فد ري، ياءيت عيسي المسيح.
15 تافي كدواڻ تاء سرورف. فركارا هودوه ۲ هق تورون كا مائنسي
كوء توء ادم، لائين دغن رحمة هق تورون كا مائنسي كوء عيسي.
كيت تاهو ده كات، دغن سبب توء ادم ساتو اورغ بوات درهاك،
ري بوات بري سموا اورغ كنا تريما حكوم ماتي. تافي توهن
تورون رحمة ري، بسر لائي فد درهاك تو، نق بري رحمة ري
سمفي كا سموا اورغ، دغن سبب ساتو اورغ جوگ، ياءيت عيسي
المسيح.

16 سموا اورغ كنا حكوم ساله كران توء ادم سئورغ بوات ساله. تافي
رحمة هق توهن تورون تو، لائين. ري بري اورغ هق بوات ساله
بايق جايي تاء ساله دفنداغن ري، تاء كنا حكوم ماتي، دغن كران
عيسي سئورغ تو.

17 ساتو اورغ بوات دوسا، ري بري سموا مائنسي دوق باوه حكوم
ماتي. تافي تنتوهق عيسي المسيح بوات بسر لائي، كران
سموا اورغ هق تريما رحمة توهن هق تاء ساله ده دفنداغن ري،
توهن بري فواق ني هيديوف سلام ۲، فس بوليه فرينته سكاللي
دغن عيسي المسيح.

18 کالو کیتو، کیت تاهو ده کات، تو ادم لغکر حکوم توهن. سبب تو، مائسي سموا دوق باوه حکومن توهن، سروف تو ادم خوگ. تافي عيسي بوات بري سمفرن سموا هق توهن سوروه. سبب تو، کیت سموا بوليه لفس فد حکوم ماتي، بوليه هيدوف چارا بارو کران عيسي.

19 تو ادم درهاک کا توهن. سبب تو، بايق اورغ کنا تغکوغ ساله دنداغن توهن. تافي عيسي طاعة کا توهن. سبب تو، بايق اورغ جاني تاء ساله ده دنداغن توهن.

چارا حال حکوم ۲ توهن دالم کتاب

20 توجوان توهن تورون حکوم ۲ دي، نق بري مائسي کیت مفاکو کات، کهور تاهو حکوم، کهور هاتي کیت براس نق لغکر حکوم تو. سوغکو هون مائسي دوق بوات دوسا، کهور بايق، کهور بايق، تافي رحمة هق توهن تورون کا مائسي، کهور بايق لاگي فد تو.

21 سسوغکو هون دولو، مائسي کیت سموا دوق باوه فرينته نفسو ۲ جاهت بلاک. سود سکالي کنا ماتي. تافي توجوان توهن، دي نق بري مائسي کیت هق فرچاي کا عيسي المسيح، ربي کیت، دوق باوه فرينته رحمة دي. سود سکالي تو، کیت تريما هيدوف چارا بارو، نغن کران کیت تاء ساله ده دنداغن توهن.

روکون مندي بفتيزما ار معنا

باب 6

1 سموا فرکارا هق اکو رویت ني سوغکو ه. کالو بالس تو، کیت نق هيدوف کو جالن مان لاني؟ کیت دوق کاچغ نق بوات دوسا لاگي که، نق بري توهن تمبه کهور بايق لاگي، رحمة دي کا کیت؟ جاغن بوات بالس تو! کیت لفس ده درفد فرينته طبيعة هق بر دوسا، سروف اورغ ماتي ده. نق کي بوات

2

دوسا بټاف فول ؟

- 3 فس روکون مندي بفتيزما تو، معنا دي مو ايغت کا بق ؟ معناښ
بيلا فواق کيت سموا تريما روکون مندي تو، جاي تندا کات
کيت توروټ جالن عيسى المسيح. معناښ، بيلا عيسى ماتي ده
تو، سروف کيت ماتي کنا حکوم سکالي دغن دي.
- 4 فس معنا دي ار لاگي. جاي تندا کات کيت کنا بوبوه دالم
قبور سکالي دغن المسيح. توجوان توهن باق کيت، دي نق
بري کيت هيډوف کوټ جالن بارو لاني، سکالي دغن المسيح
جوگ.

کيت کنا ماتي، کنا هيډوف، سکالي دغن المسيح

- 5 کالو کيت توروټ جالن سکالي دغن المسيح، تکه دي ماتي
تو، تڼتو له کيت نق بوليه تريما هيډوف چارا بارو سکالي دغن
بي جوگ.
- 6 چارا حال کيت ماتي سکالي دغن عيسى تو، کيت تاهوده کات
طبيعه کيت هق سډيا تو، سوده کنا حکوم بونوه، سکالي دغن
عيسى، دکايو امفت چابغ. توجوان توهن، دي نق بري
هافوس هابيس، فرينته طبيعه بردوسا دالم ډيري کيت، تاء
بري کيت دوق سروف همب دي ده.
- 7 کران بيلا اورغ ماتي بالس تو، دي تاء دوق باوه فرينته طبيعه
بردوسا ده.
- 8 کيت بوليه فرچاي کات، سبب کيت کنا حکوم بونوه سکالي
دغن المسيح، تڼتوله کيت بوليه هيډوف سکالي دغن بي جوگ.
- 9 کيت فون تاهوکات، المسيح سوده ماتي، فس هيډوف کليق
بي تاء ماتي ده، سبب تاء ار کواس مان ۲ بوليه بري دي ماتي
فول. دي ماتي سکالي ساج، انتوق بري مائسي لفس فد حکوم
- 10 دوسا. لاني دي هيډوف انتوق توهن ساج. فواق مو فون
- 11

سرووف تو جوگ. تکه مو دوق هيدوف لاني، مو کنا ايغت کات، سرووف مو سووڊه ماتي ده، مو تاء کنا مئنا ده دغن حکوم دوسا تو. لاني مو هيدوف انتوق توهن ساج، سکالي دغن المسيح.

جاغن بري طبيعة بردوسا مرينته دالم ديريمو

- 12 لفس فد ني، جاغن بري طبيعة بردوسا دوق مرينته دالم ديريمو، نق سوووه مو توروت هوا نفسو مو لاکي!
- 13 جاغن بري طبيعة بردوسا فاكي توبوه بدان مو، نق بوات هق جاهت. تافي سرهله ديريمو کفد توهن، بري دي فاكي توبوه بدان مو بوات هق باءيك. کران لاني مو جاي اورغ هق هيدوف کليق ده.
- 14 سبب توله، طبيعة بردوسا تاء کنا مرينته دالم ديريمو. لاني مو بوليه سلامت دغن رحمة توهن ساج، نق بوليه سلامت دغن توروت حکوم تورات تاءليه.

کنا جاي همب هق توهن

- 15 سبب کيت تاء بوليه سلامت دغن توروت حکوم تورات، تافي بوليه سلامت دغن رحمة توهن بالسني، موليق کا بق کيت دوق کاچغ بوات دوسا لاکي؟ تنتو تاء موليق.
- 16 ايغتله! کالو مو توروت ساتو۲ اورغ، بوات او۲ دي سوووه، معناق مو جاي همب دي. سابيت توله، مو کنا فيليه، نق جاي همب طبيعة بردوسا که، اتوا نق جاي همب توهن. همب طبيعة بردوسا، سوو سکالي دي کنا حکوم ماتي. همب هق طاعة کا توهن، سوو سکالي، دي جاي اورغ هق توهن کات تاء ساله ده. تافي اکو تريما کاسيه کا توهن، کران فواق
- 17

- 18 مو هق بياس جاي همب طبيعة بردوسا مو دولو، لاني مو توروٽ دغن سوڱوڱه ۲ هاتي، فجاجران يڱ بنر، هق مو تريما ده. مو لفس ده درفد فرينته طبيعة بردوسا دالم هاتي. لاني مو جاي همب توهن ده، انتوق بوات فرکارا ۲ هق باءيك.
- 19 اكو فاکي فرکتان موده ارتي، کران مستحق فواق مو فهم فجاجران ني. ماس دولو مو فاکي توبوه بدان مو جاي همب نفسو مو سنديري، انتوق بوات هق کجي ۲ سعمور، دغن سموا فرکارا هق تاءموليق. تافي لاني مو کنا فاکي توبوه بدان مو جاي همب کا توهن، انتوق بوات باءيك سعمور، کران نق هيذوف انتوق توهن ساج.
- 20 فد ماس مو دوق باوه فرينته طبيعة بردوسا دالم هاتي دولو، مو تاء جاي همب توهن انتوق بوات باءيك.
- 21 اف فائده فرکارا ۲ هوڊوه هق مو بوات دولو تو؟ لاني، کالو مو ايغت کا فرکارا ۲ تو، مونق براس مالو سلالو. تاء افائده سبب سود سکالي، کنا حکوم ماتي.
- 22 تافي لاني مو تاء جاي همب طبيعة هق بردوسا توده. مو جاي همب توهن، انتوق بوات فرکارا ۲ هق توهن برکن. سود سکالي، مونق بولييه هيذوف چارا بارو.
- 23 اورڱ هق جاي همب طبيعة بردوسا بولييه بالسن هق سوڱ فاتوت، ياءيت حکوم ماتي. تافي توهن هديه دغن کاسيه، هيذوف يڱ ککل کفد کيت، دغن کران عيسى المسيح ربّي کيت.

حکوم تاء ارکواس اتس اورڱ هق ماتي ده

باب 7

- 1 اديق براديڱ سموا تاهو ده حکوم ۲ توهن. سبب تو، مو بولييه فهم فرکارا هق اكو نق رويت ني. کيت کنا دوق باوه فرينته حکوم ۲ ني سهيڱگ ماتي، باروله لفس.
- 2 ار حکوم توهن هق کات، اورڱ بتينا کنا دوق باوه فرينته توء

3 لاکي ڊي. کالو لاکي ڊي ماتي، اورغ بتينا فون لفس ڊرڦد حکوم تو. تافي تکه تو لاکي ڊي ڊوق ار لاکي، کالو اورغ بتينا کي ڊودوق دغن اورغ لاین، ڊي بوات زناء، ڊي ساله حکوم توهن. بيلا لاکي ڊي ماتي ده، اورغ بتينا بوليہ کي منيکاح دغن اورغ لاین، تاءليه کات برزناء، کران ڊي لفس ده ڊرڦد حکوم تو.

4 فواق مو فون سروف تو جوگ. مو لفس ده ڊرڦد حکوم توهن دغن سبب ماتي، ياءيت فد ماس المسيح ماتي، معنلث، سروف مو ماتي سکالي دغن ڊي. فس لاني مو لفس ده، تاءکنا ڊوق باوه فرينته حکوم ۲ سروف هق ڊولو. مو ماسوق ده ڊوق باوه فرينته المسيح، هق توهن بري هيڊوف کليق ده.

توجوان توهن، ڊي نق بري فواق مو بوليہ بوات جاس بايق انتوق ڊي.

5 ماس ڊولو، بيلا کيت هيڊوف توروت طبيعة مائسي تو، حکوم حکوم توهن بوات بري نفسوجاهت هق کيت کهور ار کواس، هيڱ سمفي ڊي بوليہ فقسا توبوه بدان کيت، بري بوات فرکارا ۲ هق بوليہ جاس انتوق کنا ماتي ساج.

6 تافي لاني توهن بري کيت لفس توبيت ڊرڦد ليڱوغن حکوم ۲ ڊولو تو، دغن کران کيت سوده ماتي سکالي دغن المسيح. لاني کيت کنا توروت توهن، بوکن دغن جالن هق ڊولو، ياءيت بوات توروت سموا حکوم هق کيت باچ ڊالم کتاب، تافي دغن جالن هق بارو، ياءيت توروت فرينته روح توهن.

اف فائده حکوم ۲ ڊالم کتاب تو؟

7 کالو بالس تو، بڱکالي ار اورغ کات: حکوم ۲ توهن جاهت! جاغن فيکير بالس تو! توهن فاکي حکوم ۲ ڊي تو، نق بري مائسي تاهو کات، هاتي ڊي بردوسا. ميسل، کالو اکو تاء بياس نغر حکوم هق لارغ تاء بري طمع، هاتي کو تاء تاهو کات

طمع تو جاني دوسا.

- 8 تافي بيلا اكو دغر ده، حكوم تاء بري طمع تو، طبيعة بردوسا هق اكو فون تيمبول سلالو، بري اكو كهوړ ۲ نق كا بارغ اورغ. كالو اكو تاهو حكوم ني، هاتي كو تاء كابر كات دوسا.
- 9 ماس دولو، بلوم فد اكو دغر حكوم توهن تو، هاتي كو دوق سنخ ۲، تافي بيلا اكو دغر ده حكوم تو، سوسهله! سبب طبيعة هق بردوسا سوده تيمبول دالم هاتي، هيلغ هق سنخ سلالو.
- 10 معناښ حكوم ۲ هق باءيك، هق توجوان يي نق بري اكو سلامت، حكوم نيله هق بري هاتيكو كهوړ ۲ سوسه تروق، سمفي ماتي فون. سسوڅكوهښ، بوكن حكوم توهن هق بري اكو سوسه، تافي هاتي كو هق بردوسا تو، امبيق حكوم توهن نق تيفو بوات بري اكو كهوړ سوسه، سمفي كنا حكوم ماتي.
- 12 بالس نيله، كيت بوليه نمفق كات، حكوم ۲ توهن ني فركارا يځ سوچي، سموان تو سوچي، عاديل، باءيك.
- 13 كالو بالس تو، باءاف اكو كات، بارغ باءيك تو بري اكو سوسه سمفي كنا حكوم ماتي فون؟ تاءليه كات بالس تو! هق اكو كات، طبيعة بردوساله هق بري اكو جاني سوسه سمفي كنا حكوم ماتي، دغن امبيق فاكي حكوم ۲ توهن هق باءيك. بالس نيله كيت بوليه تاهو كات هاتي كيت بردوسا، فس بوليه تاهو ستارا مان جاهت هاتي ماء نسي كيت هق بردوسا تو.

اد كواس دالم هاتي هق لاون دغن فرينته توهن

- 14 كران كيت تاهو ده كات، حكوم ۲ توهن سموان ستوجو دغن كهندق توهن. تافي هاتي كو سنديري لائين، سليهينغ دغن كهندق توهن. اكو دوق سروف همب، هق كنا تورت فرينته طبيعة بردوسا دالم هاتي كو.

- 15 فرکارا ۲ کهنڊق کو نق بوات، جادي تاء بوات. فرکارا ۲ هق
اکو بنجي تاء سير بوات، اکو بوات جوڳ. اکو تاء ليه رويت
سبب اف جادي بالس ني.
- 16 کالو اکو بوات هق اکو تاء سير بوات، سبب هاتيکو کات ساله،
معناڻ هاتيکو ستوجودغن حکوم توهن هق لارڻ تاء بري بوات
17 فرکارا تو. بتول بوکن؟ معناڻ بوکن ڊيري کو سنڊيري نق
بوات فرکارا تو، تافي طبيعة بردوسا دالم هاتي، هق فقسا
بري بوات.
- 18 اکو تاهو ده کات، تاء ار سکارا هق باءيک دالم ڊيري کو، ياءيت
دالم طبيعة ماءنسي کو. کهنڊق نق بوات باءيک فون ار،
تافي تاء ار کواس نق بوات.
- 19 فرکارا موليق هق اکو نق بوات، تاء جادي بوات. فرکارا هودوه
هق اکو تاء سير بوات فون، اکو بوات جوڳ.
- 20 کالو اکو بوات فرکارا هق اکو تاء سير بوات، معناڻ بوکن اکو
سنڊيري بوات فرکارا تو، تافي طبيعة بردوسا هق فقسا اکو
بوات.
- 21 ار ساتو کواس دوق فرينته دالم هاتي کو. بيلا نق بوات هق
موليق، اکو هاله کا هق تاء موليق.
- 22 فراساڻ دالم هاتيکو نق توروت فرينته توهن، کات موليق.
- 23 تافي ار ساتو کواس هق فقسا اکو بوات توروت ني سعمور.
کواس نيلاه لاون دغن فرينته توهن، هق اکو مڱا کو کات
موليق ساءني. کواس طبيعة بردوسا دالم ڊيري کو دوق تکن
اکو سعمور.
- 24 جادي بالس نيلاه. هاتي اکو فولوس ني، برکن نق توروت
فرينته توهن، تافي هق اکو دوق بوات تاء سروف. طبيعة
ماءنسي کو سوک توروت فرينته نفسو جاهت.
- 25 سوسه سوڱگوه اکو! سياف بوليه تولوڱ اکو بري لفس درفد

کواس هق باوا، اکو ني کي سمفي حکوم ماتي؟ تريما کاسيهله کا توهن، دغن کران عیسی المسيح، ربي کيت! عیسی له هق ار کواس بري کيت لفس فد فرکارا ني.

دالم فرينته روح توهن

باب 8

- 1 اورغ هق ماسوق فرچاي دوق سهاتي سپاوا دغن عیسی المسيح، توهن کرت سين ده کات دي تاء جاتوه حکوم اتس
- 2 اورغ تو، کران کيت هق دوق سهاتي سپاوا دغن عیسی المسيح تو، دوق دالم فرينته روح توهن، هق بري کيت هيډوف چارا بارو. سبب توله، کيت لفس ده درفد فرينته حکوم ۲ توهن هق کات، کالو کيت بوات دوسا کيت کنا حکوم ماتي.
- 3 سسوځگوهن، حکوم تورات تاء ليه تولوغ کيت، کران طبيعة هق بردوسا دوق فرينته دالم هاتي کيت. تافي توهن هنتر انق یغ ساتو هق دي، تورون ماري جايي سئورغ مائسي سروف کيت. دي ماسوق دالم فواق کيت، اورغ بردوسا، کران دي نق هافوس دوسا بري هابيس. توهن جاتوه حکوم سموا دوسا اتس انق دي هق جايي مائسي سروف کيت.
- 4 دغن بوات بالس تو، توجوان توهن دي نق بري کيت بوات توروت سموا فرکارا هق حکوم توهن کات عاديل، ياءيت کيت هق توروت فرينته روح توهن دالم هاتي، بوکن توروت طبيعة هق بردوسا تو، دق!
- 5 کران اورغ هق توروت طبيعة مائسي دي، توجو کا سموا فرکارا هق طبيعة تو سوک، تافي اورغ هق توروت فرينته روح توهن، توجو کا سموا فرکارا هق توهن برکن.
- 6 فس اورغ هق توجو کا سموا فرکارا هق طبيعة مائسي دي سوک، جايي دي کنا تريما حکوم ماتي. تافي اورغ هق توجو کا سموا فرکارا هق روح توهن برکن، جايي، توهن بري دي

- هيدوف چارا بارو دغن سلامت سجهتترا.
- 7 اورغ هق سوک توروت طبيعة ماء نسي دي ، جايي سترو دغن توهن ، کران دي تاء توروت فرينته توهن . کالو دي نق توروت توهن فون تاء ليه ، کران هاله کا طبيعة ماء نسي دي .
- 8 اورغ هق توروت طبيعة دي بالس تو ، نق بري توهن برکن کا دي فون ، تاء ليه .
- 9 تافي فواق مو بوکن اورغ هق دودوق باوه فرينته طبيعة ماء نسي تو . مو اورغ هق دوق باوه فرينته روح توهن ، هق دوق اد دالم ديري مو . سياف دي تاء اد روح المسيح ساء ني دوق دالم ديري دي ، تنتواورغ تو تاء جايي ميليک المسيح .
- 10 ولو توبوه بدان مو کنا ماتي کران دوسا فون ، تافي کالو مو سوده تريما المسيح دوق دالم هاتي ، معنانش مو تريما ده هيدوف چارا بارو . کران لاني توهن کات مو تاء ساله ده .
- 11 فس ، کالو روح توهن دوق دالم هاتي مو ، تنتوله دغن کواس دي توهن نق بري توبوه بدان مو هق کنا ماتي تو ، هيدوف سمولا ، سروف دي بري عيسى هيدوف کليک ده .

کيت جايي انق ۲ توهن دغن فساک يځ مليا

- 12 دغن سموا فرکارا هق اکو رویت سائي ، اکو نق بري اديق براديق فهم کات ، طبيعة ماء نسي کيت تاء ليه بوات سکارا هق نق بري کيت مولیق . کيت تاء کنا ترلکت هاتي اف ۲ کا دي !
- 13 کالو کيت توروت طبيعة ماء نسي کيت ، تاء ليه اف ۲ ملينکن ماتي ، تافي کالو کيت تومفغ دغن کواس روح توهن ، کيت بوليه فوتوس درفد فرکارا ۲ جاهت هق طبيعة کيت سوروه بوات . بالس توله بوليه هيدوف چارا بارو دغن توهن .
- 14 کران سياف دي هق بري روح توهن فرينته دالم هاتي دي ، اورغ ۲ توله جايي انق ۲ توهن .

- 15 روح توهن هق فواق مو سوده تريما ني، ري تاء بري مو جايي همب سروف دولو، هق تاكوت توان ري نق جاتوه حكوم سعمور، بق! روح توهن نق بري مو فهم كات، مو جايي انق ۲ توهن، هق بوليه فغكيل توهن: ابا! معنائ ايه! ايه!
- 16 روح نيله هق جايي سقسي سكالې دغن هاتي كيت، كات، كيت جايي انق ۲ توهن سوغكوه. كيت هق جايي انق ۲ فون، بوليه تريما فساك يځ مليا، هق توهن جنجي نق بري كا سموا انق ۲ ري. فساك نيله كيت بوليه تريما سكالې دغن المسيح. كران تنتوله كيت هق كاسوسه، كنا سيقسا، سكالې دغن المسيح لاني، نق دافت كمليان سكالې دغن ري جوگ، فد ماس دافن.
- 18 فد فيكييران اكو فولوس، كسوساهن كيت لاني، برت ستارا مان فون، تاء اف. كران ماس كوء دافن، بيلا توهن بري پات كا كيت، كمليان هق ري چارغ تاروه انتوق كيت، كيت نق براس كسوساهن تو ريغن ساج.
- 19 سسوغكوهن، سموا مخلوق هق توهن بري جايي، اتس دنيا اتوا اتس لاغيت فون، دوق ننتي، براس نق بري سمغي باغت ۲ هاري هق توهن نق بري پات، كمليان هق انق ۲ ري.
- 20 اتس سموا مخلوق تو، توهن جاتوه حكوم ده، كات، ري كنا براوبه جايي فونه هابيس. بوكن دغن كهندق مخلوق تو جايي بالس تو، دق! تافي دغن كهندق توهن. تافي سموا مخلوق ني تاء كنا جايي فونه سروف تو سعمور. اد هرافن هق موليق لاكي. ري نق دافت مليا، سكالې دغن انق ۲ توهن جوگ.
- 21 فد هاري هق توهن نق بري انق ۲ ري تو لفس سوغكوه، درفد حكوم ساءني، انتوق تريما كمليان ري.
- 22 سموا مخلوق توهن لاني دوق برادر، سروف اورغ بتينا دوق ساكيت نق برانق. فس بوكن مخلوق ني ساج، هق دوق برادر، تكه ري دوق ننتي هاري تو. فواق كيت فون، هق

سوده تريما روح توهن ، براس بالس تو جوگ . کيت نق بري
سمفي باغت ۲ ، هاري هق کيت دافت کمليان هق انق ۲ توهن
پايت هاري هق توهن نق بري توبوه بدان کيت سلامت دغن
سمفرن . لاني توهن بري روح دي دوق دالم هاتي کيت جايي
تندا کات تنتو توهن نق بري سمفرن سموا فرکارا ني .

هراڻ يڄ تنتو

24 لاني کيت دوق ننتي دغن هراڻ فنوه ، کات ، توهن نق
بري سلامت دغن سمفرن . کالو کيت دوق هارڻ نق بوليہ ،
معناش کيت تاء بوليہ لاڳي . تاء ار سياف دوق ننتي فرکارا هق
دي بوليہ ده .

25 بيلا کيت تاهو دغن تنتو کات ، کيت نق بوليہ ساتو فرکارا ،
هق تاء بياس نمفق لاڳي ، هراڻ توله بري کيت کاچڻ ننتي
هيڱگ سمفي کيت بوليہ .

روح توهن جايي فنولوڻ کيت

26 فس سا لاڳي ، توهن بري روح دي جايي فنولوڻ کيت جوگ ،
کران هاتي کيت تاء قواۃ . ميسل ، بيلا کيت برعا کيت تاء تاهو
بالس مان کنا برعا دغن توهن . ماس تو جوگ ، روح توهن
سنديري مينتاء دعا انتوق کيت ، دغن سوارا دالم هاتي ، هق
ماءنسي تاء فندي نق سبوت .

27 تافي توهن تاهو سموا فرکارا دالم هاتي ماءنسي . دي برکن
فرکارا ۲ هق روح دي مينتاء تو ، سبب سموا فرکارا هق روح
توهن مينتاء انتوق اورڻ هق کاسيه کا توهن ، تنتو ستوجو
دغن کهندق توهن بلاک .

کاسيه ساينغ هق توهن تاء فوتوس

- 28 اورغ ۲ هق کاسيه کا توهن، هق توهن فغکيل توروت
 دي، دغن توجوان نق بري سمفرن کهندق دي دالم هيديفن
 اورغ تو، کيت تاهو ده کات، فرکارا مان ۲ هق جادي اتس
 اورغ تو، توهن دوق اد سکالي دغن دي، نق بري دي بوليه
 باءيك دالم فرکارا تو.
- 29 سموا اورغ ني فون، توهن فيليه ده دري دولو ۲ لاکي. دي نق
 بري جادي سروف دغن انق يغ ساتو. توهن لتق انق يغ
 ساتو دي تو جادي کاکق توا، نق باواء اديق ۲ سموا توروت
 دي کي.
- 30 فس فواق ني، هق توهن برکهندق دولو نق لتق بري جادي
 انق ۲ دي، تنتو توهن بري کواس کا دي نق توروت توهن
 کاتيق. فس اورغ هق توهن بري توروت دي تو، تنتو توهن
 کيرا کات تاء ساله ده. فس اورغ هق توهن کات تاء ساله تو،
 توهن نق بري کا دي کمليان سروف هق توهن.
- 31 کيت سوده فرهاتي کليه سموا فرکارا هق توهن بوات انتوق
 کيت. فس هاتي کيت براس بالاس مان؟ توهن دوق سبله
 کيت، تاء اد سياف بوليه منغ کالو برلاون دغن کيت.
- 32 ايغتله! توهن ساينغ کا انق يغ ساتو هق دي. تافي ولو
 دي ساينغ سکالي فون، دي بري انق دي کنا حکوم برت
 گنتي کيت. سابيت توهن کاسيه کا کيت ستارا تو، تنتوله
 دي نق بري سموا فرکارا هق موليق کا کيت کاتيق، دغن
 سبب دي بري ده انق دي تو.
- 33 سياف دي براني چاري بوکو نق ابو کيت هق توهن سوده
 فيليه؟ تاء اد سياف براني، کران توهن سنديري کات کيت
- 34 تاء ساله ده. سياف دي نق جاتوه حکوم اتس کيت لاني؟

عيسى المسيح كه؟ دق! دپاله هق يځ كڼا حكوم ماتي، گنتي
 كيت. فس هق اد فائده لاکي كا كيت، بيلا عيسى هيدوف كليق
 ده تو، توهن بري دي ناءيك كا تمفت هق بوليه كواس فنوه،
 سبله كانن دي. دسيتو دي دوق مينتاء دعا انتوق كيت سعمور.
 35 سياف دي اد كواس بري كيت فوتوس درفد كاسيه ساينغ المسيح؟
 تاءاد اف سكارا بوليه بري كيت فوتوس. كسوساهن دوق تيمفا
 ماري سكليلينغ توبوه كيت، كيت تاءاد اره نق گامق، اورغ بوات
 پاڻ كا كيت تروق، مكانن تاءاد، فكاين فون تاءاد. سموا
 كسوساهن ني تاءليه بري فوتوس كاسيه ساينغ المسيح كقد
 كيت. كيت دوق دالم بهيا جوگ، بڅكالي سمفي ماتي، كڼا
 بونوه فون اد. سروف ايات دالم كتاب سبوت كات:

اورغ دالم فواق كيت، كڼا بونوه سعمور، کران دي
 كاسيه كا توهن. فس اد اورغ نمفق كيت ني سروف
 كمبيغ بيرينغ هق بوليه سمبله.

37 تافي دالم سموا كسوساهن سروف ني، كيت نق منغ برجاي،
 دغن سبب المسيح، هق كاسيه كا كيت!
 38 کران اكو يقين كات، ماتي اتوا هيدوف فون، ملائكة ۲ اتوا
 جين شيطان فون، كواس مان ۲ دالم دنيا اتوا اخيرة فون،
 39 مخلوق مان ۲ فون دلاغيث اتوا دومي، تاءاد اف سكارا بوليه
 بري كيت فوتوس درفد كاسيه ساينغ هق توهن، هق دي بري
 كا كيت دغن عيسى المسيح، ربي كيت!

باب 9 فولوس ايغت كا اورغ يهودي، بغسا دي سنديري

1 اكوني جادي ميليق المسيح. سبب توله، اكو تاءليه
 بوهوځ. فس لاکي، روح توهن دوق فيمفين هاتي کو، دي بري
 اكو تاهو کات هق اكو رويت ني، هق سوځگوه.

- 2 ياءيت بيلا اكو ترايغت كا اورغ يهوي، هق جادي راكيغ داره اكو سنديري، اكو براس دوک چيتا سوغکوه. هاتي کو براس نق فچه، ايغت کا دي تو، هق تاسير توروت عيسى المسيح.
- 3 اچي بوليه، نق بري تبوه بدان کو سومغه دتوهن، بري اكو فوتوس دغن عيسى المسيح، اصل بوليه اديق براديق کو، هق جادي سبغسا دغن اكو، برهوبوغ دغن توهن. تافي تاءليه !
- 4 بگسا اسرائيل کيت ني، جادي بگسا هق توهن فيليه، نق بري جادي انق دي. توهن يځ مهاملپا فون تورون دوق رافت دغن کيت، بري بگسا کيت بوليه برهوبوغ دغن دي. دي فون تورون حکوم تورات کا کيت ني. دي بري کا کيت سماو اتوران بوات عمل عبادة، هق سوغ بوليه سمبه کا دي. فس، کيت تريما ده سماو فرجنجين دي، چارا حال جالن سلامت کوء دافن.
- 5 بگسا کيت ني، کتورون فواق توء نينيق دوا بلس تو. فس المسيح هق توهن سوروه ماري کا دنيا، بيلا دي تورون جادي مائسي، دي جايي سئورغ بگسا کيت جوگ. توهن هق دوق ميرينته سگل ۲ ني، فس کيت فون کنا فوجي کا دي سعمور. سغوتيله، امين.

فرجنجين توهن تاءبرگنتوغ فد مائسي

- 6 کيت تاءليه کات، لاني توهن تاسير بري هق دي جنجي دولو تو، دق ! کيت کنا ارتي کات، اورغ هق توهن فيليه جايي ميليق دي تو، بوکن سماو بگسا اسرائيل، دق !
- 7 سروف تو جوگ، بوکن سماو کتورون نبي ابراهيم هق بوليه فساک سباگي انق ۲ توهن. ماس دولو، توهن رويت کا نبي ابراهيم، کات: انق چوچو اسحاق ساج، هق اکو لتق نق بوليه تريما فساک مو !

- 8 معنائ فواق هق توهن فغگيل انق دي، بوکن سماو کتورونن ابراهيم کو، داگیغ داره دي، دق. تافي سماو اورغ هق تورون کو، جالن فرجنجین توهن ساج.
- 9 کران بیلا توهن ماري رویت کا ابراهيم ماس دولو، چارا حال نق بولیه انق، دي کات: بیلا سمغي ماس اکو جنجي، اکونق ماري فول. فد ماس تو فون، ساره نق برانق انق جنتن!
- 10 فس بوکن دغن ساره ساج. بیلا ربیقه، بینی تو، نینیق کیت
- 11 اسحاق تو، برانق کمبر، توهن رویت کا دي، بلوم فد دي
- 12 برانق لاگی کات: انق سولوغ مو نق فغگيل کا ادیق دي توان! ماس توهن رویت بالس تو، دوا برادیق تو تاء برانق لاگی، تاء بوات اف سکارا لاگی، باءیک اتوا جاهت. توجوان توهن نق بري تنتو کات: دي نق فیلیه مان ۲ سئورغ، هق دي جنجي دولو، ایکوت کهندق دي. جادي سابیت توهن سوروه اورغ تورویت دي، بوکن سابیت اف ۲ اورغ تو بوات، دق!
- 13 اینیله معنا هق توهن رویت دالم کتاب، کات: یعقوب هق ادیق تو، اکو کاسیه. عیسو هق کاکق تو، اکو تاء کاسیه.

نمفق سرورف توهن تاء عادیل فیلیه اورغ بالس تو

- 14 هق توهن بوات بالس تو، نمفق سرورف دي تاء عادیل ، تافي کیت تاءلیه کات بالس تو.
- 15 دغرله فرکتان توهن کا نبی موسی دولو:

اکو اد کواس بولیه تنجوق کاسیه سایغ کا سیاف ۲ فون ایکوت کهندق کو! توهن کات. فس اکو کسیاغ بلس کا اورغ مان ۲ فون، ایکوت کهندق کو.

- 16 بالس توله کیت بولیه ارتي کات، نق فیلیه اورغ مان بولیه سلامت تو، تاء برگنتوغ دغن کهندق مائنسي، اتوا دغن

فريواتن مائنسي فون، تافي برگنتوغ دغن كاسيه ساينغ هق
توهن ساج .

17 فس فركتائن توهن دالم كتاب ار سا لائي . توهن رويت كا
فيرعون، راج مصير دولو، كات:

اكو لتق مو بري دودوق رتمفت مو، هيغڭ سمفي
ماس لاني . سبب نيله، اكو نق بوات كا تبوه بدن
مو، بري اورغ نمفق كواس كو، توهن كات . فس اكو
نق بري مشهور سرات دنيا حال نام اكو توهن ني .

18 سكت نيله چوكوف بري كيت ارتي كات، توهن كسياغ بلس
كا اورغ اتوا ري بوليه بري اورغ كرس هاتي لائي، ايكوت كهندق
ري .

باءاف توهن حكوم ساله كا كيت؟

19 بڭكالي ار اورغ نق تان فول: كالو مائنسي تاءليه لاون

كهندق توهن، بقاءاف توهن حكوم ساله كا كيت؟

20 اكو فولوس كات: هي مائنسي! مو تاءسوغ فاتوت كيچيق
بالس تو . مائنسي مان براني بحس دغن توهن؟ كالو بنديغ،
بارغ هق توڭغ بوات، تاءليه تان توڭغ: بقاءاف توڭغ بوات روف
كو بالس ني؟

21 توڭغ هق بوات مڭكوق فيڭڭن، ار كواس امبيق تانه ليات نق

بوات ايكوت سوک ري . ري بوليه امبيق ستوڭگول تانه بوات
فيڭڭن دوا بوتير . سبوتير موليق، تاروه فاکي هاري راي،
سبوتير لائي تو، کاسر سيکيت، بوليه بوات فاکي هاري ۲ .

22 فس توهن بوليه بوات مائنسي کيت ايکوت سوک ري، سروف
توڭغ دغن مڭكوق فيڭڭن سائي جوڭ . ار مائنسي هق تاء
ترفاکي . توهن كهندق نق بري نمفق مرک ري، نق جاتوه

23 حڪوم ڪا فواق ني . ري نق بري تاهو ڪواس ري ، تافي ري صبر ،
 ري تاءِ جاتوه حڪوم ساللو ، بق ! ڪران ري نق بري تاهو جوڳ
 حال ڪمليان ري يڄ لببھ ۲ تو ، هق ري نق تورون ڪا ماءُ نسي ،
 ياءِ ڪيت هق توهن ڪسياڄ بلس ، هق ري لتق ڊولو ۲ لاڳي
 انتوق تريما ڪمليان ري تو .

24 فواق ڪيت له ، هق توهن سوروه توروت ري ، بوڪن اورڱ بڻسا
 يهوي ساج ، بق ! اورڱ بڻسا لائين ۲ فون ، توهن فيليه جوڳ .
 25 توهن سوده رويت حال ڪجادين ني ڊولو ڊالم ڪتاب نبي هوشيا
 ڪات :

فواق هق تاءِ جاني ميليڪ ڪو ، اڪو نق لتق جاني
 ميليڪ ڪو ، توهن ڪات . فواق هق اڪو تاءِ ڪاسيه ڊولو ،
 لاني اڪو نق بري جاني فواق هق اڪو ڪاسيه .
 فس رتمفت هق توهن بياس ڪات : فواق مو بوڪن
 ميليڪ ڪو ، رتمفت تو جوڳ ، توهن هق اد ڪواس بري
 هيڊوف سلام ۲ ، ري نق لتق فواق تو بري جاني
 انق ۲ ري !

27 نبي يعشيا بياس سرو حال بڻسا اورڱ اسرائيل ڪات :

اورڱ اسرائيل بايق سروف فاسير دفنتي ، تافي اورڱ
 ڊالم فواق ني هق نق بوليه سلامت ، سيڪيت ساج .
 ڪران بيلا سمفي ماس ري ، توهن نق جاتوه حڪوم دڻ
 سڪليف مات ، ساللو ، اتس ماءُ نسي سرات دنيا .

29 هق ني فون جاني سروف نبي يعشيا رويت ڊولو جوڳ ، ڪات :

ڪالو توهن يڄ مها ڪواس تاءِ ڪسياڄ بلس ڪا ڪيت ، بري
 اورڱ سيڪيت ۲ سلامت ، نق بوليه ڪتورونن

تنتو بغسا کیت کنا حکوم سروف بندر صودوم دغن
بندر گموره، هق توهن هافوس بري هيلغ هابيس تو!

بغسا اسرائیل براس نق سلامت کوء جالن لاین

- 30 فس کیت نق ارتي توجوان توهن بالس مان؟ جاي بالس
ني. بغسا لاین ۲ هق تاء تاهو جالن نق بري برهوبوغ جاي
باءیک دغن توهن، فواق ۲ نیله، توهن بري بولیه برهوبوغ
جاي باءیک دغن ري کوء جالن فرچاي کاعیسی المسیح.
- 31 تافي بغسا اسرائیل هق توهن سوده فیلیه تو، بي راجین
چاري جالن نق بولیه برهوبوغ جاي باءیک دغن توهن، دغن
توروت حکوم اوکام سموا، تافي چاري بالس تو، تاء تمو.
- 32 سابیت اف ري تاء تمو؟ سابیت ري هارف دوق توروت سموا
حکوم اوکام تو، نق بولیه سلامت. بي تاء سیر فرچاي کاعیسی
المسیح. فس بي سنتوق دباتو هق توهن لتق تو.
- 33 سروف ار ایات دالم کتاب هق کات:

فرهاتي باءیک ۲ له، توهن کات. اکو سوده لتق ساتو
باتو هق بسر، دتغه جالن کوت صیون. باتو ني نق
بري سنتوق اورغ ۲ لالو، نق بري ري ربه. تافي اورغ
هق بریري اتس باتو تو، هرافن ري کجت سوغکوه،
بي تاء جاتوه.

بغسا اسرائیل تاء فهم جالن هق توهن لتق

باب 10

- 1 یا ادیق برادیق کو! اکو دوق مینتاء دغن توهن، دغن
سوغکوه ۲ هاتي، بري بغسا اکو، اورغ اسرائیل بولیه سلامت
کاتیق. اینیله کهندق هاتي کو! اکو بولیه رویت کات سوغکوه،

- اورغ اسرائيل راجين بوات عمل عبادة نق بري توهن برکن کا
 ني، تافي هق ي بوات تو، بوکن هق توهن سوروه سوڱوه.
 3 جالن هق توهن لتق، نق بري دي بوليه کات مائسي تاء ساله
 تو، فواق ني تاء فهم، تاء تاهو. دي تورووت جالن لائين، هق
 دي سنديري. دي تاء سير تورووت جالن هق توهن چارغ کا دي.
 4 جالن کنا تورووت حکوم ۲ دالم تورات، انتوق نق بوليه سلامت
 تو، المسيح بوات بري ليسوس ده. لاني اورغ هق تورووت
 جالن فرچاي کا المسيح تو ساج له، توهن کات تاء ساله ده
 دنداغن دي.

تاء ار سياف هق توهن تاء سير بري سلامت

- 5 نبي موسی رويت حال نق جاري تاء ساله دنداغن توهن
 کوء جالن تورووت حکوم ۲ دالم کتاب. دي کات:

کالو بوليه تورووت حکوم ۲ تو هابيس بلاک، تنتو بوليه
 هيڊوف دغن سلامت.

- 6 تافي نق جاري تاء ساله کوء جالن فرچاي کا عیسی تو، ار اپات
 کات بالس ني:

جاغن مو فيکير دالم هاتي، سياف دي بوليه ناء يک کا شرگ؟

- يائيت سروف مو سنديري کنا ناء يک امبيق المسيح تورووت ماري،
 7 نق! فس ايات تو کات لاکي:

جاغن مو کات: سياف دي بوليه تورووت کا عالم موت؟

- يائيت سروف مو سنديري کنا تورووت امبيق المسيح ناء يک درفد
 تمغت ماتي تو. هق تو فون دق جوگ!
 8 هق بتول سوڱوه بالس ني:

خبر هق توهن تورون کا فواق مو، تاء کنا کي چاري
 جاء ۲۰هه، نق! خبر ني دوق اد دالم مولوت مو ده،
 فس سمفي کا هاتي مو کاتيقي.

يائيت خبر کات مو بولييه سلامت دغن فرچاي، خبر هق فواق
 اگو کي دوق مفاجر رات ۲.

معناش، کالو مو مفاکو دغن مولوت کات، عيسي ديالہ ربّي،
 فس، کالو مو فرچاي دالم هاتي کات، توهن بري عيسي هيدوف
 کليقي، تنتو مو نق بولييه سلامت.

کران کيت فرچاي دالم هاتي بالس ني، فس توهن رويت کات:
 اورغ ني تاء سالہ ده دفتداغن اگو، توهن! فس بيلا کيت مفاکو
 دغن مولوت بالس ني فون، توهن رويت کات: اورغ ني بولييه
 سلامت ده! کتاب توهن رويت بالس تو جوگ، کات:

اورغ مان ۲ هق فرچاي کا دي، هرافن اورغ تو تاء سيا ۲.

اورغ بغسا مان ۲ فون، تاء کيرا کات اورغ يهوي اتوا اورغ بغسا
 لائين ۲، توهن يغ سا، دي دوق مريسته اتس مائسي سروف
 سموا. فس رحمة دي تورون کا سموا اورغ هق مينتاء تولوغن
 دغن دي. کتاب توهن فون رويت بالس تو جوگ، کات:

اورغ هق فگخ کا نام ربّي، تنتو نق بولييه سلامت.

بالس مان توهن نق بري سموا اورغ دغر خبر يغ بائيك؟

تافي اورغ هق تاء اد فلواغ نق فرچاي کا عيسي لاکي، نق
 فگخ کا نام دي بالس مان؟ تنتو تاء ليه. فس، اورغ هق تاء
 دغر خبر دي لاکي، نق فرچاي بالس مان؟ تاء ليه جوگ. فس
 کالو تاء اورغ کي رويت خبر ني کا دي، فواق ني نق دغر

15 بالس مان؟ فس کالو توهن تاء سوروه اورغ کي، اورغ نق کي
رويت خبر بآيك کا مائسي بالس مان؟ تنتو تاء ليه! تافي
توهن سوروه اورغ کي ده، سروف ايات دالم بکتاب رويت کات:

موليقله اد اورغ هق ماري رويت خبر بآيك.

16 تافي اورغ هق بوليه دغر خبر بآيك فون، بوکن کات ماسوق
هاتي سمو، دق! نبي يعشيا فون کات:

يا توهنکو! دمان اورغ هق فرچاي خبر کيت رويت ني؟

17 بالس نيله کيت بوليه کات، اورغ فرچاي سابيت بي دغر. فس
اورغ دغر فون، سابيت اد اورغ ماري رويت چارا حال المسيح.
18 تافي اکو نق تان سيکيت، فولوس کات. فواق ني تاء اد فلواغ
نق دغر که، خبر هق توهن؟ تاء دغر بآف! کتاب توهن کات:

بويي سوارا اورغ کي رويت خبر ني بوليه دغر رات ۲ تمفت،
فرکتان دي بوليه سمغي کا سمو اورغ.

19 کالو بالس تو، اکو نق تان سيکيت لاگي، فولوس کات. اورغ
يهوي، بغسا اسرائيل تو، تاء ارتي که، هق توهن نق رويت
کا دي؟ دغرله فرکتان دالم کتاب نبي موسي، دپاله هق مولا ۲
رويت کا اورغ اسرائيل، کات:

توهن نق بري فواق مو براس برديگي جوگ کا بغسا
لائين ۲، هق مولا ۲ توهن تاء فيليه جادي بغسا دي،
تافي لاني نق توروت توهن. دي نق بري فواق مو
براس فانس هاتي کران بغسا لائين هق تاء اد علمو،
بوليه ماسوق جادي ميليقي توهن.

20 فس نبي يعشيا تاء تاکوت رويت فرکتان توهن، نق بري تروس

ترغ لاکي، کات:

اورغ هق تاء بياس چاري جالن نق تمو دغن توهن،
توهن بري تمو ده. اورغ هق تاء بياس مینتاء نق کنل
دغن توهن، توهن بري کنل ده.

21 تافي چارا حال اورغ اسرائیل توهن کات بلس ني:

اکو هولور تاغن کو، فغگیل فواق مو سیاغ مالم تاء
فوتوس، تافي مو درهاک سعمور، تاء سير طاعة کا اکو،
توهن کات.

باب 11 توهن نق کسياغ بلس کا اورغ اسرائیل جوگ

1 کالو بلس تو، سوغگوه کارق، توهن چابوت تولق سموا
اورغ اسرائیل، هق جادي ميليقي دي دولو تو؟ دق! تاءليه کات
بلس تو! ايغتلہ، اکو فولوس جادي بغسا اورغ اسرائیل جوگ. نبي
ابراهيم جادي تو نينيق اکو، اکو فون کتورونن بينجامين هق
فغگیل کا ابراهيم تو: تو پيغ.

2 تنتو توهن تاء چابوت بغسا کيت، هق دي فيليه ده دري دولو
لاکي. ايغتلہ کا چريتا نبي الياس دالم کتاب. الياس دوق ادو
سموا کسلاهن اورغ اسرائیل کا توهن. الياس کات:

3 يا توهنکو! فواق ني بونوه نبي ۲ توهن. دي بوات
خيانة بري فونه هابيس، سموا تمفت قربان کا توهن،
سهيغک تيغگل اکو سئورغ هق توروت توهن.
فس فواق تو نق ماري امبيق پاوا کو جوگ!

4 تافي توهن جواب لاکو مان کا الياس؟ توهن کات:

نق! ار توجوه ريبو اورغ لاڳي، هق اكو جاگ انتوق
ديري كو. فواق ني تاء بياس سمبه كا برهالا بعيل تو.

5 فس سمغي كا ماس كيت لاني فون، فولوس كات، جاني سروف
تو جوگ. دالم فواق اسرائيل كيت، ولو تاء براف بايق مان
فون، تافي ار اورغ هق توهن فيليه نق بري سلامت، كران
كسياغ بلس ساج.

6 توهن فيليه بالس ني، بوكن سابيت اف ۲ هق اورغ توبوات،
نق! كالو مائسي بوليه بوات اف ۲ بري توهن فيليه دي،
كيت تاء ليه كات، دي بوليه سلامت كران توهن كسياغ بلس
ساج، بوكن؟

7 سركت نيله، كيت سوده رويت كات: بغسا اسرائيل سموا تاء
بوليه هق دي روق چاري تو. ار جوگ سفاق دالم بغسا
اسرائيل تو، هق توهن فيليه نق بري بوليه سلامت. تافي
كباپقن اورغ جاني كرس فروت، تاء سير تورووت هق توهن
رويت. سروف ايات دالم كتاب هق كات:

8 توهن بري هاتي اورغ تو بيغوغ، هيگك سمغي لاني.
مات فون تاء نمغق، تليغا فون تاء نغر، اف ۲ هق
توهن رويت.

9 فس نبي داءود رويت حال فواق ني جوگ، كات:

تکه دي روق ماکن جاموان دغن سوك هاتي فون،
مينتاء بري دي تيبام کنا ايگت، سروف بوروغ کنا
جبق، سروف بناتغ کنا فرغکف. تکه بلغ برجالن
فون بري دي سيمفت ربه، بري دي تريما بالسن
هق سوغ دغن هق دي بوات تو

يا توهنكو! بري مات يي كلابو، تاءليه نمفق هق چره .
بري توبوه يي تاءليه بغه، کران تغکوغن يي برت ساعت.

10

بغسا لائين ۲ بوليه تريما سلامت

کالو بالس تو، سوغگوه کا نق، بيلا اورغ ييهوي جاتوه
تمفت يي، معنائ يي تاءليه ناءيك کليق که؟ نق! تاءليه کات
بالس تو. سسوغگوهئن، سبب اورغ ييهوي جاتوه دالم کسلاهن
يي تو، باروله بغسا لائين ۲ اد فلواغ نق بوليه سلامت. توجوان
توهن، يي نق بري اورغ ييهوي کنا برئگي کا بغسا ۲ تو فول.
تافي فيکيرله! بيلا اورغ ييهوي جاتوه دالم کسلاهن يي تو،
سموا مائنسي بوليه کاي. بغسا لائين بوليه رحمة بايق سبب
اورغ ييهوي کورغ فرچاي. کالو بالس تو، بيلا بيلاغن اورغ
يهوي هق نق فرچاي چوکوف ده، ماس دافن، بايق مان لاکي
رحمة هق توهن نق بري کا مائنسي؟ تاءه ابيس نق کيرا!

11

12

فولوس کيچيق دغن اديق براديق بغسا لائين ۲ فول

لاني اکو دوق کيچيق دغن اديق براديق بغسا لائين ۲، بوکن
دغن اورغ ييهوي. کران اکو جادي اورغ هق باوا تيته توهن
انتوق فواق مو. فس اکو براس بسر هاتي نق ماري کرج دغن
فواق مو کاتيق. تافي کهندق هاتي کو، اچي بوليه بري ستغه
اورغ دالم فواق اورغ ييهوي کو برئگي کا فواق مو، براس نق
کاتيق هق مو بوليه ده، ياءيت سلامت.
کران فيکيرله! بيلا توهن بواغ اورغ ييهوي توبيت، سموا مائنسي
بوليه برهوبوغ جادي بائيك سمولا دغن توهن. کالو بالس تو، بيلا
توهن تريما اورغ ييهوي کليق سمولا، نق جادي بالس مان فول؟
جاي سروف کيت تيغوق اورغ ماتي هيذوف کليق سمولا!

13

14

15

- 16 اكو نق بنديغ سيكيت لاي. بيلا اورغ بوات روتي، فس امبيق
سكرت دولو، كي سمبه كا توهن، جاي تندا كات سماو روتي تو
بارغ سوچي انتوق توهن. فس فوهون كايو فول. كالو هومبي
جاي بارغ سوچي انتوق توهن، معنائ داهن ۲ فون جاي
سوچي انتوق توهن جوگ.
- 17 بغسا يهودي جاي سروف فوهون هق سديا، داهن ۲ يي كنا
توتوه ستغه. فس توان فوهون تو امبيق انق ۲ هق تومبوه
سنديري، ماري كهوين دغن فوهون هق سديا سائي تو. فواق
مو فون بوليه بنديغ دغن انق ۲ هق بارو كهوين دغن فوهون
سديا تو. لاني مو دوق لكت ده دفوهون بغسا يهودي. مو
دوق ماكن جاس دي، سروف انق ۲ هق بارو كهوين ماكن اير
دفوهون سديا تو.
- 18 سابيت توله، جاغن مو كيچيق بسر، نق هينا كا داهن هق
كنا توتوه دفوهون تو، ياءيت كا بغسا يهودي. ايغته! بوكن
داهن هق فيرا هومبي، جاي هومبي هق فيرا داهن ۲ ياءيت
فواق مو.
- 19 بغكالي مونق كات: سوغكوه، تافي داهن تو كنا توتوه، انتوق
بري اكو ماري كهوين دفوهون، نق گنتي داهن تو!
- 20 موليقله! تافي جاغن مو لوف، داهن ۲ تو كنا توتوه دغن
سبب يي تاء سير فرچاي. فواق مو فون ماري دوق رتمفت
داهن هق توتوه سائي تو، دغن سبب مو فرچاي سلج، تافي
جاغن مو بسر كا ديري كات مو دوق بالس تو. باءيك مو تاكوت
كا توهن سيكيت!
- 21 اورغ يهودي هق تاء فرچاي تو، توهن تاء بري يي بوليه سلامت،
ولو يي جاي داهن ۲ هق سجاتي فون. كالو مو فوتوس فرچاي،
توهن نق بري مو بوليه سلامت كه؟ تنذوق جوگ!
- 22 فرهاتيله باءيك ۲ بالس مان توهن كسياغ بلس، فس بالس مان

23 ٻي جاتوه حڪوم. فواق هق جاتوه دالم ڪسلاهن تو، توهن
 حڪوم برت. فواق مو فون توهن ڪسياغ بلس سعمور، ڪالو مو
 دوق توروٽ ٻي. تافي ڪالو مو تاءُ توروٽ، توهن نق ڪرت فوتوس.
 فس اورغ يهوي هق ڪرت ده، ڪالو ڊي تيغگل جالن هق ٻي
 تاءُ سير فرچاي تو، توهن نق امبيق ٻي بري ٻي ڪهوين دغن
 فوهون سديا فول. ڪران توهن بوليہ بوات بالس تو، بوڪن؟
 24 سڪت نيہ ڪيت بوليہ ارتي، فواق مو بغسا لائين ۲ تو جادي
 سروف داهن دفوهون هق تومبوه سنديري دالم هوتن. اورغ
 ڪي ڪرت امبيق ماري ڪهوين دغن فوهون موليق هق اورغ دوق
 بلا. بوات بالس تو فون، ساله عاده جوگ. فواق اورغ يهوي
 فول، ٻي جادي سروف فوهون هق اورغ بلا ده. داهن ۲ ٻي
 هق ڪنا ڪرت تو، موده ساج ڪالو توهن نق امبيق ڪهوين
 ڪليق دفوهون سديا هق ٻي سنديري تو، بوڪن؟

توجوان توهن دغن اورغ يهوي ماس دافن

25 هي اديق براديق ڪو! دغن بنديغن فوهون سائي، اڪو نق
 بري مو تاهو فرڪارا هق بارو درفد توهن، هق مو تاءُ بياس
 دغر. ڪران تاڪوت، ڪالو مو توروٽ فيڪيران مو سنديري، مو نق
 فهم ساله. فرڪارا هق بارو ني، ياءُيت بغسا اسرائيل نق دوق
 هاتي ڪرس بالس ني سهيغگ سمغي ماس هق بغسا لائين ۲ تو،
 بيلاغن ٻي هق نق ماسوق دالم ميليق توهن، چوڪوف ده.
 26 باروله بغسا اسرائيل سموا بوليہ تريما سلامت گاتيقي. ڪتاب
 توهن رويت حال فرڪارا ني ڪات:

ٻي هق بري فواق اسرائيل سلامت نق تيمبول دالم ڪوت
 صيون. ٻي نق بواغ ڪجهائن دالم هاتي فواق يعقوب ني.

27 فس، توهن کات، بيلا اڪو سوده هافوس سموا دوسا دي
بري هابيس، اڪو نق جنجي دغن دي بري کمس.

28 دغن سبب بغسا يهودي تاء سير تريما خبر يڄ باءڪ، جاي
سروف دي سترو دغن توهن، کران توهن نق بري فلواڄ کا
بغسا لائن تريما خبر ني دولو. تافي دغن سبب توهن سوده
فيليه بغسا يهودي ني، فس ايغت کا فواق توئ نينيق دي دولو،
توهن کاسيه سوڱڳوه کا فواق ني.

29 کران بيلا توهن فيليه اورڄ مان ۲ انتوق تريما سموا رحمة دي،
توهن تاء موڱکير جنجي.

30 دولو، فواق مو هق جاي بغسا لائن، تاء ار طاعة کا توهن.
لاني مو بوليه تريما ده کسياڄ بلس هق توهن، کران اورڄ
يهودي تاء سير طاعة تو.

31 اورڄ يهودي فون نق جاي سروف تو جوڳ. لاني دي تاء طاعة
کا توهن، تافي توجوان توهن، دي نق بري بغسا يهودي ار
فلواڄ بوليه تريما کسياڄ بلس هق دي، کران فواق مو سوده
تريما ده دولو.

32 بالس نيله، توجوان توهن نق بري سموا مائسي نمفق کات
دي دوق باوه کواس طبيعة دي، هق بري دي تاء طاعة کا
توهن تو. سود سکالي توهن نق بري سموا مائسي بوليه
سلامت، کران کسياڄ بلس دي ساج.

فوجيله کفد توهن!

33 بايق سوڱڳوه ۲ رحمة توهن! دي ارتي سموا دغن سمفرن،
علمو دي دالم. توجوان توهن، مائسي کيت تاء فندي نق
کامق.

34 سروف ايات دالم کتاب کات:

ٲاءار سياف بوليه تاهو فيكيران توهن ،
ٲاءار سياف بوليه نصيحة كا ري ،
ماءنسي ٲاءار اف سكارا هق ري بوليه بري
كا توهن ، نق بري توهن بالس كليق كا ري .

35

36 سموا فرکارا هق ار ، توهن بري جاني . سموا هق توهن بري
جاني تو فون ، روق دالم کواس ري ، فس توجو کا ري بلاک .
فوجيله توهن یغ مهاملیا ، بوات سلام ۲ ! سغوتيله ، امين .

سرله ديرمو کا توهن

باب 12

1 هي اديق براديق کو! کران توهن سوده تورون رحمة ري
رغن تنجوق کسیاغ بلس ري کا فواق مو بايق کيتو لالو ، اکو
نق سوروه اديق براديق جوگ ، سرله ديرمي مو کا توهن ،
سروف مو قربان ديرمي مو نق هيديوف انتوق توهن ساج ، کو
جالن ري برکنن . اينيله چارا هق سبنر ، هق سوغ انتوق
کيت نق سمبه کا توهن .

2 جاغن مو توروت چنتوه دنيا هق معصية تو ، نق بوات
سروف ري . مو کنا سره ديرمي مو کا توهن ، بري ري توکر
سموا فيکيران دالم هاتي مو بري بارو . بالس توله ، مو بوليه
فرهاتي کليه اف کهندق توهن هق مو کنا بوات ، ياءيت
سموا فرکارا هق موليق ، هق توهن برکنن ، هق چوکوف
سمفرن انتوق مو .

3 کران رحمة هق توهن سوده بري کا اکو ، سابيت تو اکوبراني
سوروه فواق مو گنف ۲ اورغ ، کات ، جاغن مو بسر کا ديرمي
مو لبیه فد هق سوغ فاتوت . مو کنا تيمبغ هاتي مو ،
جاغن برت ريغن ، ستارا مان توهن تورون رحمة ري کقد مو ،
ستارا تو جوگ ، مو تريماله رغن فرچاي .

- 4 کران توبوه مائسي اتس اورغ تو ار بايق اغکوت، تيف ۲ اغکوت
ار کرج ري ماسيغ ۲. هق تو کرج تو، هق ني کرج ني.
- 5 فواق کيت بايق اورغ فون جاني ساتو توبوه، سبب کيت سموا
دوق سهاتي سپاوا دغن المسيح. فس کيت دوق برهوبوغ مو
اکو سروف اغکوت دالم توبوه.
- 6 سبب نيلاه، نعمة هق توهن تورون اتس ديري کيت ماسيغ ۲،
کيت کنا فاکيله، انتوق اديق براديق کيت. کالو توهن بري
کيت فندي ممغي فرمان توهن، کيت کنا رویتله بري اورغ دغر،
سکت مان هق توهن بري کا کيت تريما دغن فرچاي.
- 7 کالو توهن بري کيت کرج انتوق اديق براديق، کيت کنا بواتله
کرج تو دغن راجين. کالو فندي مئاجر، کنا مئاجر.
- 8 اورغ هق فندي بري اديق براديق کرس سماغت، کنا کي تولوغله
بالس تو. اورغ هق ار هرت، نق بري کا اديق براديق هق
تاءار، کنا بري دغن اخلاص هاتي. اورغ هق جاني کاکق فواق
المسيح فون، کنا دوق جاگ موليق ۲. فس اورغ هق ار کرج
نق تولوغ اورغ سوسه، کنا بوات کرج ني دغن سوک هاتي.

اديق براديق دالم فواق المسيح کنا کاسيه مو اکو

- 9 کاسيه مو اکو ني، کنا کاسيه دغن سوغکوه ۲ هاتي. مو کنا
بنچي کا هق جاهت. بري هاتيمو ايغت کا هق موليق.
- 10 اديق براديق دالم فواق المسيح کنا دوق کاسيه مو اکو سروف
اورغ کاسيه کا وارييس ۲ دي سنديري. فس کيت کنا چاري جالن
نق بوات حرمة کا اديق براديق کيت سعمور.
- 11 جاغن بري لمه سماغت، تافي بوات سروف افي مپالا، قواة دغن
کواس روح توهن، نق بوات کرج انتوق توهن.
- 12 مو کنا سوک هاتي سعمورله! کران ايغت کا هرافن مو هق

- تنتو سوغڱوه . کالو جاتوه دالم کسوساهن اف ۲ فون ، موتا
کنا تاکوت ، مو برديري تگفله ، فس مو کنا مینتا دعا سعمور .
13 کالو ادیق برادیق دالم فواق المسیح کورغ اف ۲ ، تولوغله دي .
چاري جالن اجق اورغ ماري کا رومه مو بیلا ۲ فون .
14 اورغ هق بوات پاڻ کفد مو ، مو کنا مینتا توهن تورون رحمة
اتس دي . مینتا بالس توله ، جاغن مینتا بري توهن مرک کا دي !
15 بیلا سائین سوک ، مو کنا سوک سکالي دغن دي . بیلا سائین
ترياق فون ، مو کنا توروت سديه گاتیق .
16 مو کنا دوق سنغ مواکو . مو جاغن سومبوغ . کالو تمو دغن
کرج ترهینا فون مو کنا بوات جوگ . جاغن تنجوق چریدیق
دافن اورغ لائین .
17 کالو اورغ بوات ساله کفد مو ، جاغن مو بالس جاهت کا دي .
چوب بوات فرکارا هق سموا اورغ بولیه کات بتول .
18 اچي بولیه ، بالیق هاتي مو ، دوقله بائیک دغن اورغ سعمور .
19 ادیق برادیق کو ، جاغن مو براس گرم ، نق بالس اتس اورغ
هق بوات جاهت کفد مو . بلرله ، بري توهن مرک کا دي
سرورف کتاب توهن رویت ، کات :

اکو نق حکوم کا اورغ هق بوات جاهت .
اکوله نق بالس کا دي ، توهن کات .

- 20 تافي کیت کنا بوات توروت کتاب توهن هق کات بالس ني :

بیلا سترومو دوق لافر ، مو کنا بري ماکن کا دي .
بیلا دي دهاگ ایر ، بریله ایر کا دي مینوم .
کالو موبوات دغن کاسیه بالس ني ، سترومو تنتو
دي نق کابر کات دي ساله ساغت .

- 21 جاغن موبري هاله کا هق جاهت . مو کنا بالس بائیک کا دي ،

فس هق باءيك تونق منع.

اورغ هق كراجان لتق جايي كتوا كيت

باب 13

- 1 سماو اورغ كنا توروت فرينته كتوا۲ هق كراجان لتق انتوق كيت. كران تاءاد سياف بوليه ناءيك كا تمغت يي تو، ملينكن توهن ينر بري كا يي. فواق هق دوق ميرينته كيت فون، جايي توهن هق سوده لتق يي ده.
- 2 سابيت توله، افبيل كيت لاون دغن فواق هق جايي كتوا كيت، سروف كيت لاون دغن هق توهن لتق ده. فس كالو كيت بوات بالس تو، توهن نق جاتوه حكوم اتس كيت.
- 3 فواق كتوا۲، بوكن يي نق بري تاكوت اورغ هق بوات باءيك، بق! تافي يي نق بري اورغ هق بوات ساله تاكوت كا يي. كالو مو تاءاسير اد سبب كنا تاكوت كا كتوا، مو كنا بوات هق موليق، بوكن؟ فس كتوا فون نق فوجي كا فواق مو سعمور.
- 4 كران كتوا تو كرج هق توهن سوروه، انتوق جاگ فواق مو. تافي كالو مو بوات ساله، مو كنا تاكوت كا يي، كران يي اد كوأس بوليه جاتوه حكوم اتس مو سماو. يي كرج هق توهن سوروه، بالس جاهت كا اورغ هق بوات جاهت، نق بري تاهو كات، توهن مرك كا اورغ هق بوات جاهت تو.
- 5 سابيت توله، مو كنا توروت فرينته فواق هق كراجان لتق جايي كتوا مو تو. بوكن سابيت مو تاكوت كنا دندا توهن ساج، بق! تافي سابيت هاتي مو تاهو كات بتول، مو بوات بالس تو. فس سا لاكي، مو كنا باير حاصل سماو هق فواق كتوا۲ سوروه، كران بيلا يي بچارا سماو فركارا ني، يي فون كرج هق توهن سوروه.
- 7 بريله كا تيف۲ اورغ هق مان فاتوت انتوق يي، اورغ هق ماري كوتيف حاصل توبوه، بايرله كا يي. اورغ هق ماري

ڪوتيف حاصل رومه فون، بايرله ڪا ري جوگ. اورغ هق فاتوت
ڪنا حرمة، حرمتله ڪا ري بلاڪ.

جالن تنجوق ڪاسيه مو اڪو

- 8 جاغن مو تراوتغ دغن اورغ مان ۲ فون، تافي مو ڪنا تراوتغ
ڪاسيه مو اڪو سعمور. فس ڪاسيه ني جاني سروف اوتغ هق
تاء هابيس نق باير سعمور. اورغ هق ڪاسيه ڪا سموا اورغ
بالس ني، جاني ڪبتولن دغن حڪوم توهن دالم تورات.
- 9 ڪران حڪوم ۲ توهن هق لارغ بوات، سروف بوات زنا، بونوه
اورغ، چوري طمع اتوا لاءين ۲ لاکي، ڪيت بوليه رويت دغن
ريغڪس بالس ني:

مو ڪنا ڪاسيه ڪا سام ۲ مائسي سروف مو ڪاسيه
ڪا ڊيري مو سنڊيري.

- 10 ڪيت تاء بوات ساله ڪا اورغ هق ڪيت ڪاسيه، بوڪن؟ سابيت
توله، دغن ڪاسيه ني ڪيت بري سمفرن حڪوم ۲ توهن.
- 11 فس لاکي، مو تاهو جوگ ڪات، دڪت ده ماس هق مستحق انتوق
ڪيت. جاني فرياغ ڪيت ڪنا باغون تيدور، دوق سيمفن نق کي،
ڪران ماس هق توهن نق بري سلامت ڪهور ۲ دڪت سعمور.
- لاني دڪت فد هاري هق ڪيت بارو فرچاي دولو تو.
- 12 لاني فرياغ گلف دڪت نق هابيس، فرياغ چره دڪت نق سمفي.
باء ڪيت تيغگل سموا فرڪارا هق اورغ سوڪ بوات دالم گلف،
ڪيت امبيق فاكي سنجات هق فاتوت ڪنا فاكي دالم چره.
- 13 ڪيت ڪنا توروٽ جالن هق سوغ دغن هق دوق دالم چره.
جاغن ماڪن ارق رامي ۲ نق بري مابوق. جاغن مائين جنتن
بتينا، جاغن بوات فرڪارا بري اورغ لاءين مالو. جاغن دوق
بريال، بردهگي سام سنڊيري. دق! مو ڪنا امبيق فاكي سنجات
- 14

هق ربّي عيسى المسيح بري كقد مو. جاغن مو بلا طبيعة
بردوسا مو، نق بري فواس هوا نفسو مو!

جاغن حكوم ساله كا اديق براديق مو

باب 14

- 1 اورغ دالم فواق المسيح هق فرچاي تاء قواة لاکي، فواق مو
کنا تريماله جاني اديق براديق مو جوگ. تافي جاغن موبحس
چارا حال هق اديق مو تو دوق فکغ لاکي.
- 2 ميسل کات، ار اورغ هق قواة فرچاي، سابيت تو دي بوليه
ماکن بلاک. جاغن دي فندغ رنده کا اديق دي، هق فرچاي
تاء قواة لاکي، سابيت تو، دي تاء سير ماکن بلاک، نق ماکن
سايور ساج.
- 3 فس اورغ هق ماکن سايور ساج فون، جاغن دي حکوم ساله
کا کاکي دي هق کات دي بوليه ماکن بلاک. کران توهن سوده
تريما دوا اورغ تو سروف.
- 4 باء اف مو دوق حکوم ساله کا همب اورغ لائين؟ جاري توان
دي سنديري هق بوليه کرت سين اتس دي، کات ساله اتوا
بتول. فس تنتو اورغ ني نق کات تاء ساله، کران توان دي
ربّي عيسى سنديري، هق ار کواس بوليه بري دي تاء ساله.
- 5 فس ميسل کات، ار اورغ دالم فواق المسيح هق فکغ ساتو
هاري کات سوچي فد هاري لائين. فس اورغ لائين فول کات
سموا هاري سوچي بلاک. باء يک بري کنف ۲ اورغ تتف دالم
هاتي، هق مان دي فرچاي، فس توروت هق تو.
- 6 ايغتله! اورغ هق کات ساتو هاري سوچي فد هاري لائين ۲،
توجوان دي، نق حرمة کا ربّي عيسى، بوکن؟ فس اورغ هق
دوق ماکن سموا فرکارا ساء ني فون، دي نق حرمة کا ربّي جوگ
بوکن؟ کران دي ماکن بارغ تو دغن اوچف تريما کاسيه کا
توهن. فس اورغ هق تاء سير ماکن هق تو، هق ني، دي

بوات بالس تو، نق حرمة کا رٻي دغن اوچف تريما کاسيه کا توهن جوگ.

7 تاءار سياف دالم فواق کيت هق هيڊوف اتوا ماتي فون انتوق

8 ڊيري بي سنڊيري ساج. تکه کيت دوق هيڊوف، کيت هيڊوف

انتوق رٻي عيسى. فس بيلا کيت ماتي فون، کيت ماتي انتوق

رٻي جوگ. کران هيڊوف اتوا ماتي فون، کيت جادي مليق

رٻي عيسى بلاک.

9 کران توجوان عيسى المسيح ماتي فس هيڊوف کليق سمولا،

يائيت بي نق جادي رٻي هق بوليہ فرينته اتس اورغ هيڊوف

دغن اورغ ماتي.

10 کالو بالس تو، هي اڊيق! باءاف مو نق حکوم ساله کا کاکق مو؟

فس مو هق جادي کاکق، باءاف مو فندغ هيٺا کا اڊيق مو؟

ايڦتله، کيت سموا کٺا برڊيري دافن توهن، هق نق جادي

11 حاڪيم کيت. کران ار ايات دالم کتاب کات:

اکوله توهن هق تاءار اوال، تاءار اخير. تنتوله
ماءنسي سموا نق سجود حرمة دافن کو، سمواٺ نق
مڱاکو کات، اکوله توهن.

12 بالس نوله، کيت گنف ۲ اورغ کٺا جواب ماسيغ ۲ کا توهن چارا

حال ڊيري کيت سنڊيري.

جاغن بري اڊيق مو گليچوه جاتوه دالم دوسا

13 سابيت توله، هي اڊيق براديق کو، لفس فد ني، جاغن

کيت کات اورغ تو ساله، اورغ ني ساله، دالم فواق کيت.

باءيك کيت کرت دالم هاتي کات، جاغن کيت بوات اف سکارا،

هق نق بري اڊيق کيت تو سنتوق گليچوه جاتوه دالم دوسا.

14 اکو دوق سهاتي سپاوا دغن رٻي عيسى. سبب توله اکو يقين

- کات، لاني تاءاد بارغ حرام بارغ حلال انتوق کيت. تافي کالو
اديق براديق سئورغ براس کات بارغ تو، بارغ ني حرام انتوق
دي، تنتو بارغ تو حرام لاکي انتوق دي.
- 15 کيت کنا فيکير بالس ني: کالو کيت ماکن اف ۲، فس بارغ هق
کيت ماکن تو بري هاتي اديق کيت سوسه، بالس ني سروف
کيت تاءکاسيه کا دي. جاغن بوات خيانه کا دي، دغن
سابيت هق کيت ماکن ساءني! ايثله، عيسى المسيح، دي
جوغ ريلا ماتي نق بري اورغ تو بوليه سلامت.
- 16 سبب توله، کيت جاغن بري چله کا اورغ، نق کيجيق هينا
کا فرکارا ۲ موليق هق کيت فگخ.
- 17 کران بيلا توهن دوق مريسته دالم هاتي ماءنسي، دي تاءکات
مستحق، هق مان بوليه ماکن، هق مان تاءليه ماکن، دق!
هق مستحق سکالي، توهن بري اورغ تو برهوبوغ باءيك دغن
دي سمولا، تاءساله اف ۲، فس نق بري دي دوق سوک ريا، کران
روح توهن دوق اد دالم دير دي سمور.
- 18 اورغ هق دوق بيچارا کا المسيح بالس تو، تنتو توهن برکن
کا دي، فس ماءنسي فون نق مفاکو کات دي باءيك جوک.
- 19 سبب توله، کيت کنا کاچغ بوات سموا فرکارا هق بوليه تولوغ
بري اديق براديق دوق باءيك سام سنديري، فس هق بوليه بري
دي کهور قواة فرچاي سمور.
- 20 کيت تاءسير بري جاي فونه کرج توهن دالم هاتي اديق براديق
کيت، دغن کران مکانن ساءني. سوغکوه مکانن سموا تاء حرام
انتوق کيت، تافي کالو اورغ لائين جاتوه دالم دوسا، کران هق
کيت ماکن، ساله جوک هق کيت بوات تو.
- 21 کالو نق بوات هق بتول، کيت کنا فتغ، جاغن ماکن هق
اديق کيت تاء برکن تو، سروف داگيغ، اتواير جابيت،
فس جاغن بوات اف ۲ فون، کالو هق تو نق بري اديق کيت

22 جاتوه دالم دوسا . هق کيت فکځ چارا حال بارغ ۲ هق کيت بوليہ ماکن ني، فکځله، تافي فکځ دافن توهن ساج، جاڻن بري کيکير کا اورغ لائين! سنځ هاتيله اورغ هق تاهو ده کات، فرکارا مان ۲ هق دي دوق بوات تو، بتول، تاء کنا امبيق ساله کا ديري دي.

23 تافي اورغ هق واويه ماکن اتوا تاء ليه ماکن، تافي ماکن جوڳ توهن نق حکوم ساله کا اورغ تو، کران دي ماکن هق هاتي ني تاء فرچاي کات بتول. اف ۲ هق کيت بوات هق واويه کات بتول کا نق، هق تو جاني دوسا انتوق کيت.

ايڻتله کا ادیق برادیق دولو

باب 15

- 1 کيت هق قواۃ فرچاي، کنا صبر کا اورغ هق فرچاي تاء قواۃ لاکي. کيت تاء کنا ايڻت کا ديري کيت ساج.
- 2 دق! تيف ۲ اورغ کنا ايڻت نق بوات باءيک کا ادیق برادیق ني. فس بري ني کهور قواۃ فرچاي لاکي.
- 3 کران تيغوقله المسيح! ري تاء ايڻت کا ديري ني سنديري، نق! ار ايات دالم کتاب هق رويت حال المسيح، کات:

يا توهن، فرکتان اورغ هق سومغه ماكي کفد مو، کنا کا اکو جوڳ.

- 4 فس سموا فرکارا هق توهن بري اورغ توليس دالم کتاب ماس دولو، دي نق بري جادي فلاجران انتوق کيت جوڳ. توجوان ني دغن ايات ۲ دالم کتاب ني، دي نق تمبه سماغت کا کيت، فس بري کيت بوليہ برديري تکف، بوليہ ننتي نق تريما هرافن کيت هق تنتو.
- 5 توهنله هق بري سماغت کا کيت، هق بري کيت بوليہ برديري تکف. فس اکو دوق مينتاء دغن ري، نق بري فواق مو کنف ۲

- 6 اورغ بوليه دوق سنغ مو اكو ، کران مو دوق سهاتي سپاوا دغن عيسى المسيح . بالس توله ، فواق مو نق فوجي کا توهن ، بوپي سروف دغن ساتو سوارا ، ياءيت نق فوجي کا دي هق جادي توهن ، فس جادي باف هق عيسى المسيح ، ربي کيت .
- 7 سابيت توله ، مو کنا تريما اديق براديق سموا دالم فواق المسيح جادي فواق مو ، سروف عيسى المسيح تريما کيت سموا جادي ميليق دي . بالس توله نق بري نمفق کمليان توهن .

اورغ سموا بغسا کنا فوجي کا توهن

- 8 فس دغرله هق اكو نق رويت ني ! توجوان المسيح ماري ، دي نق جادي فنولوغ کا بغسا يهودي بري سلامت . دي بري پات کات ، توهن تاء موغکير جنجي ، فس دي بري جادي فرکارا ۲ هق توهن جنجي دولو کا تو نينيق اورغ يهودي .
- 9 فس اد توجوان سا لاگي . المسيح نق بري بغسا لائين ۲ سموا بوليه فوجي کا توهن ، سبب توهن کسياغ بلس کا بغسا دي جوگ . اد ايات دالم کتاب هق رويت حال ني ، کات :

سابيت توله اكو نق کي اوچف شکور کا توهن دغن بغسا لائين ۲ کاتيق . اكو نق پاپي فوجين کا نام توهن دالم فواق ۲ تو .

- 10 فس ايات سا لاگي ، کات :

هي بغسا لائين ۲ ، ماريله برسوک ریا سکالي دغن بغسا مائسي هق توهن فيليه ده دولو !

- 11 فس سا لاگي :

فوجيله کا توهن ، مو اورغ بغسا لائين . بري سموا مائسي فوجي کا دي !

12 فس نبي يعمشيا فول رويت کات:

سئورغ کتورونن جسي نق ماري فول . دپاله هق تيمبول
ماري نق امبيق فرينته اتس بغسا لائين ۲ . فس بغسا
لائين ۲ تو فون نق هارف کا دي سمات ۲ .

13 توهنله هق بري هرافن ني کا فواق مو کاتيق . سابيت توله ،
اکو دوق مينتاء دغن دي ، نق بري فواق مو سوک رپا ، دغن
سنگ هاتي ، کران مو دوق فرچاي کا دي . بالس نيله ، دغن
کواس روح توهن ، هرافن مو نق کهور ۲ تگوه سعمور .

فولوس براني فسن کا اورغ روم هق دي تاء کنل

14 سوغکوه فون . اکو براس فواس هاتي چارا حال اديق براديق هق
نق تريما سورت ني . اکو تاهوده کات ، مو جاي اورغ بائیک .
مو ارتي ده سموا فرکارا ، فس مو بوليه نصيحه مو اکو موليق ده .
15 تافي اکو براني نق رويت دوا تيگ امفت فرکارا دالم سورت ني
هق اکو نق بري اديق براديق ايغت . اکو براني بالس ني ،
16 کران دغن رحمة توهن ، اکو جاي فسوروه عيسى المسيح . دي
سوروه اکو کي رويت خبر بائیک حال توهن کا بغسا لائين ۲ .
کرج هق اکو بوات ني ، بوليه بنديغ دغن کرج امام ، دبيت
المقديس هق باواء قربان نق سمبه کا توهن . توجوان اکو فون
نق باواء اورغ بغسا لائين ۲ ماري سروف قربان هق لوق سوچي
انتوق توهن ، دغن کواس روح دي ، يائيت قربان هق توهن
برکنن نق تريما .

17 سبب توله ، اکو براس بسر هاتي چارا حال کرج هق اکو بوات
کا توهن ني ، دغن کواس عيسى المسيح .

18 اکو تاء براني رويت اف ۲ ، ملينکن فرکارا ۲ هق عيسى المسيح
بري جاي دغن فاکي اکو ني ، انتوق نق بري اورغ بغسا لائين ۲

فرچاي ڪا دي دغن طاعة. دي فاکي اڪو ني نق رويت فرڪتائن
هق دي بري، نق بوات فرڪارا ۲ فليق هق جادي تندا بسر،
فس هق بري نمفق ڪواس روح دي.

19 اڪو برجالن امبيق ڊڪوت جروسليم، هيڱ سمفي ڊنگري
عيليريڪوم، فس اڪو ڊوق رويت سعمور، خبر بءِ يڪ چارا حال
عيسى المسيح، بلغ ۲ ڊوق کي، هيڱ سمفي چوڪوف ستغڪوف.

20 چيتا ۲ اڪو نق کي رويت خبر بءِ يڪ ني، ڊسماو تمفت اورغ هق
تاءِ بياس دغر حال المسيح لاکي. سبب اڪو تاءِ سير کي رويت
ڪا تمفت اورغ بياس دغر ده، سروف اورغ هق کي بوات رومه
اتس فلافيق هق اورغ لتق ده.

21 بق! اڪو نق بري جادي سروف ايات دالم ڪتاب ڪات:

ڊتمفت اورغ تاءِ بياس رويت حال دي، اورغ نق
تاهو: ڊتمفت اورغ تاءِ بياس دغر فون، اورغ نق ارتي.

فولوس ڊوق چيتا ۲ نق کي سمفي ڪا ڪوت روم

22 سابيت نيله، اڪو نق کي زياره فواق مو بايق ڪالي ده،

23 تافي ار چمفيغ سعمور. تافي لاني، ڪرج اڪو هق ڊوق کي ڪا

سموا تمفت تو، هابيس ده. فس سابيت اڪو ڊوق نق کي

زياره ڪا تمفت فواق مو بايق تاهون ده، اڪو ار هرافن نق
بوليه کي جوگ.

24 بلغ ۲ کي ڪا ڊنگري اسفاپول، اڪو نق برادو دغن فواق مو، دوا

تيگ هاري. لفس تو، بيلا اڪو براس فواس هاتي ده تيغوق

موڪ مو، اڪو نق کي فول ڪا ڊنگري تو، دغن فرتولوغن فواق مو.

25 تافي لاني اڪو برحاجت نق کي ڪا ڪوت جروسليم ڊولو، نق

تولوغ منولوغ اورغ هق جادي ميليق توهن ڊسيتو.

26 ڪران فواق ۲ المسيح ڊنگري ماڪونيا تو، دغن ڊنگري انخيا،

- نق کیریم دویت انتوق نق تولوغ اورغ مسکین ، دالم فواق هق جاني میلیق توهن دکوت جروسلم .
- 27 دوا فواق تو سندیری ستوجو نق تولوغ بالس تو ، بوکن اکو فقسا دي ، دق ! سسوغکوهن ، سروف دي براوتغ دغن ادیق برادیق اورغ یهودي هق جاني فواق المسیح کاتیق . سبب اورغ بغسا لائین ۲ بولیه سگیان دالم رحمة توهن دغن کران اورغ یهودي تو . فس مولیقله دي تولوغ بری گا اورغ یهودي ، ادیق برادیق دي ، سگیان حاصلن هق توهن بری کا دي ، بوکن ؟
- 28 بیلا اکو بوات کرج تو سوده ده ، یائیت بری دویت تو سماو کا دي ده ، اکو نق کي هالا کا نکري سفاپول فول ، فس نق
- 29 برادو تغه جالن دتمفت فواق مو . فس بیلا اکو کي سمفي کا تمفت فواق مو ، اکو تاهو ده کات ، عیسی المسیح نق بری کیت سماو براونتوغ چوکوف سمفرن .

فولوس سوروه اورغ روم مینتا دعا انتوق دي کاتیق

- 30 فس اکو براس نق سوروه ادیق برادیق سماو ، فاکت مینتا دعا دغن سوغکوه ۲ هاتي سکالي دغن اکو ، انتوق کرج اکو ني ، دغن سبب هرافن کیت سماو ني کا عیسی المسیح ربی کیت ، فس ، دغن سبب کاسیه مواکو هق روح توهن بوبوه دالم هاتي کیت سماو .
- 31 مینتا توهن بری اکو سلامت درفد اورغ یهودي هق تا فرچاي کا عیسی ، دنکري یهودیه تو . فس مینتا توهن بری اورغ هق جاني میلیق دي ، دکوت جروسلم تو ، تریما دغن سوک هاتي ، اف ۲ هق اکو بولیه تولوغ دي .
- 32 لفس تو فول ، کالو توهن بنر بری ، اکو نق ماری کا تمفت مو ، دغن سوک ۲ هاتي ، نق امبیق ریغ سبنتر دغن فواق مو .
- 33 اکو بریعا دغن توهن هق بولیه بری هاتي کیت سنغ ، مینتا

بري دي دوق سکالي دغن فواق مو سموا، امين!

باب 16 فولوس کيريم کاسيه کا بايق اورغ دکوت روم

- 1 فس اکو نق بري فواق مو کتل دغن اديق براديق کو، نام فيبيه. دي سئورغ بتينا هق راجين بوات کرج انتوق عيسي المسيح، دبندر کينکريا.
- 2 تولوغ سمبوت دي کاتيق، سبب دي اورغ هق کاسيه کا عيسي المسيح سروف دغن فواق مو جوگ. فس سمبوت دي بالس مان فاتوت دغن اورغ هق جاي ميليق توهن. کالو دي فايه، اتوا کورغ اف ۲ فون، مينتا مو تولوغ دي کاتيق، کران دي بياس بوات باءیک کا بايق اورغ، فس کا اکو جوگ.
- 3 اکو نق کيريم کاسيه کا فريسکيلا دغن لاکي دي اکويلا. دوا اورغ ني بوات کرج سروف دغن اکو، انتوق عيسي المسيح.
- 4 دي جوغ ماتي کران نق تولوغ بري اکو سلامت جالن مريها. اکو تالوف کا بوي دي هق بوات کا اکو. فس بوکن اکو سئورغ ساج دق! اورغ بغسا لائين ۲ فون هق جاي فواق ۲ المسيح دسموا تمفت، براس سروف اکو جوگ.
- 5 اکو نق کيريم کاسيه کا فواق المسيح هق کي فراچوم درومه اکويلا کاتيق. فس سلامتله کا سائين کو، ايفينيتوس، هق اکو کاسيه. دياله اورغ هق فرچاي مولا ۲ سکالي کا عيسي المسيح دنکري اسيا.
- 6 فس سلامتله کا مريم، هق راجين کرج تولوغ فواق مو. فس، سلامتله کا اندرونيکوس دغن جونياس، اديق براديق بغسا يهوي کو، هق بياس ماسوق گوق سروف اکو جوگ. فواق صحابة هق رافت دغن عيسي، کتل موليق سموا دغن دي.
- 7 فس دوا اورغ تو جاي کريستين دولو فد اکو لاکي.
- 8 فس سلامتله کا امفلياتوس، سائين رافت دغن اکو، کران کيت

- کڊوا کاسيه عيسى المسيح .
- 9 سلامتله کا اوربانوس ، هق بياس کرج کا المسيح دغن اکو جوگ .
فس کا ستاحيس ، هق اکو کاسيه سوڱوه .
- 10 فسي لاڳي ، سلامتله کا افليس . بي بري نمفق ده کات بي کاسيه
ستيا کا المسيح . فس سلامتله کا سمو اورغ درومه اريستوبولس .
- 11 سلامتله کا هيروڊيون ، اديق براديق بغسا ييهودي کو ، فس اديق
براديق کريستين دالم فواق درومه نرسيسوس .
- 12 فس ، سلامتله کا دوا براديق تو ، نام تروفينه دغن تروفوسه .
بي فون بوات کرج انتوق المسيح جوگ . فس ، کاميق فرسيس ،
هق سمو اورغ کاسيه سوڱوه . بي بوات کرج بايق انتوق
توهن .
- 13 فس لاڳي ، سلامتله کا روفوس ، بي هق جاي نمبور ساتو دالم
کرج ربّي عيسى . فس کامق روفوس کاتيقي . بي جاي سروف
مق اکو سنديري .
- 14 سلامتله کا اسينکريتوس ، فليگون ، هرميس ، فاتروبس ، هرمس ،
فس کا سمو اديق براديق دالم فواق بي .
- 15 سلامتله کا فيلولوکوس دغن بيني بي جوليا . فس کفد نيوريوس
دغن اديق بتينا بي کاتيقي . فس کفد اوليمفوس ، دغن سمو
اورغ هق جادي ميليق ربّي عيسى دالم فواق بي .
- 16 بري اديق براديق سمو تنجوق کاسيه مو اکو ، دغن کوچوف ،
بوات سروف اديق براديق کيت سنديري . فواق المسيح
دسمو تمفت باليق ني ، کيريم کاسيه کا فواق مو دکوت روم !

فسنن فولوس هق سود سکالي

- 17 لاني اکو نق فسن سيکيت کا اديق براديق کو . جاگاله
بايڪ ۲ ! اد اورغ هق سوک بري فواق کريستين جادي باله مو
اکو سام سنديري ، نق بري مو تيگل جالن هق بتول . اورغ

- تو سوک مهاجر لائين فد هق اديق براديق تريما ده دولو .
 18 مو جاغن برسائين دغن اورغ لاگو تو . فواق تو بوکن اورغ هق
 بوات کرج انتوق المسيح ، ربي کيت ، دق ! دي بوات کرج نق
 بري فواس هاتي دي سنديري . دي چريديق ، فاکي کيچيفن
 19 مانيس ۲ انتوق نق تيفو اورغ هاتي باءيك . سموا اورغ تاهوره
 کات فواق مو طاعة سوغکوه ۲ . بيلا اکودغر خبران ني ، اکو
 براس سوک هاتي ، تافي کهندق هاتيکو ، اکو نق بري اديق
 براديق جادي سروف اورغ هق تاءندي بوات هق جاهت ، فندي
 بوات هق باءيل ساج .
 20 فس تاءلام لاگي ، توهن هق اد کواس بري کيت سموا سلامت ، دي
 نق بري هيبليس هاله کا فواق مو ، سروف دي دوق باوه کاکيمو .
 اکو ميتاء توهن بري رحمة هق دوق اد درفد عيسي المسيح ،
 ربي کيت ، تورون دوق اتس فواق مو سموا ، امين .

سائين ۲ فولوس کيريم سلام کا اورغ روم

- 21 تيموتيوس هق دوق کرج سکالي دغن اکو دسيني ، دي کيريم سلام
 کا فواق مو گاتيق . فس لوسيوس ، جاسون دغن سوسفاتير ، هق
 جادي اديق براديق يهوي کو ، سموان کيريم سلام جوگ .
 22 اکو ترتيوس ، هق توکغ منوليس سورت ني فون ، کيريم سلام
 دغن نام ربي عيسي .
 23 فس گايوس ، توان رومه تمفت فواق المسيح ماري فراچوم باليق
 24 ني ، دي فون کيريم سلام جوگ . اراستوس هق دوق جاگ دويت
 تيتسابان دبندر ني ، دغن کوارتس ، اديق کيت سئورغ لاگي ، دي
 کدوا فون کيريم سلام جوگ .

فولوس دوق فوجي کمليان هق توهن

- 25 فوجيله کا توهن بڃ مهامليا ، هق اد کواس بوليه بري مو

برديري تگف سعمور. خبر باءيك هق اكو دوق رويت، جامين
کات بالس تو، ياءيت خبر باءيك چارا حال عيسى المسيح، رهسيا
هق توهن تاروه تاءبوك دري اوال لاگي.

26 تافي لاني دي بوك بري بوليه تاهوره کا مائيسي، کوء جالن
کتاب نبي ۲ دولو. فس توهن کيت، هق تاءار اوال تاءار احير،
دي سوروه کيت کي رويت خبر ني کا سموا بغسا، نق بري اورغ
فرچاي دغن طاعة کا دي.

27 ديا له توهن يځ سا، هق ارتي سموا فرکارا. دغن کران عيسى
المسيح له، مائيسي کيت بوليه فوجي کا توهن، بوات سلام ۲ له.
امين.